

NWER NYI MAK

*Etib bi Jon ji nwohngalahb tiingi no
(Mat 3:1-12; Luk 3:1-18; Jon 1:19-28)*

¹ Mbomannahb a nnoobo etib bi Jisos Kraist Mmon Esowo bi a.

² Mahne mahne nnyehnamahr Aisaya nyono go ege a nwer ana Esowo tongo Mmon ewe re,
“M bahke tumu ntiingetib ewame tv re á gbo-a mbang,
ba lennge mbang ka-a.”

³ “Nne noa, kp'rabe go elka emahng re,
'Tuungen mbang nyi Ntul bahke sehngre,
wahn lim t'tor.' ”

⁴ Ane noo bo jo lung-e re Jon, á je go elka emahng, song kehme ane tiingi re, “Gboon ndon go egahne abiafem, wahn bel ewohngalahb, eji Esowo l'tahm ka-n go egahne abiafem.”

⁵ Ane kpee ba lene o nfam nyio nyi Judea, a ane kpee ba lene go Jeusalem jo lohngo je goji Jon, song fvvrv abiafem ebo, fere bel ewohngalahb go Jodan.

⁶ Jon jo kake nsol nyi bo limi go anyar nnyam nyi bo kpo lung re ekamel, fere jo gbaange egbaange ngunyam go ebun. Á jo li agohrobi, fere jo yab akehng ekon.

⁷ Á kehm kehme ane tiingi re, “Nne no kp'bake go, á li nj'joka nne sehngre me. Jol me, n tohkem

f'fuumu re, me n kehme go ndi fanng'e alehke akpaketa enye.

⁸ Eltum ename li re, me n jo wohng-n alahb maka maka. Ye ji kp'bake, bahk-n wohngo alahb go Etingi Etohko.”*

Ewohngalahb ji Jisos bele no, a elgaare ni nnehm gar-e no

(Mat 3:13-4:11; Luk 3:21-22; 4:1-13)

⁹ Ngare nyio Jisos lohngo go Nasaret ji Galili, ba go Jodan. Jon kehm-e wohngo alahb.

¹⁰ Jisos lohngo kan go alahb me, á kehm nyehne ejahbetul Esowo kp'lenng'e. Etohko ji Esowo kehm lohngo go elfoongo ni ebbehl, badde ba jol a ne.

¹¹ Á kehm wuku ellum go ejahbetul Esowo ni bungu re, “Wo wo li akor-m mmon ewame no kpo kor-m s'sehng.”†

¹² Tvtv ona etohko ji Esowo kehm soro rod-e tahm a ne go elka emahng.

¹³ Á kange elka emahng nio nfung atahl abal. Owo nnehm gar-e no, re á yel go abiafem. Enyam bi kpo jol emahng jolo ona fvfo. Owo enjel nyi Esowo kehm lohngo ba kak-e ebo.‡

Ana Jisos lungu abasahre nsahre, ane na ani

(Mat 4:12-22; Luk 4:14-15; 5:1-11)

¹⁴ Ngare nyio, Jon, bo m-e kak go ngbekobo. Jisos kehm tahme song rehng go Galili, song tiingi nnoobo etib bi Esowo.

* **1:8 1:8** Elt 2:4 † **1:11 1:11** Mak 9:7 ‡ **1:13 1:13** Luk 22:43; Hib 1:14

¹⁵ Á jo bungu re, “Etingitingi, ngare ebrehng. § Etul bi Esowo ebkabbe. Gboon ndon go egahne abiafem, wahn taame tv nnoobo etib bi Esowo!”

¹⁶ Eji Jisos jo jen egbuk eto ji Galili, á nyehne abasahre nsahre, ane na abal, Saimon, a Andru ji mmonannyehn Saimon, bo jo kake erim go eto.

¹⁷ Jisos kehm tongo bo re, “Tahmen toon-m wahn! M bahk-n limi, á nehm kpe bim nsahre, m bahke fere jo bim ane.”

¹⁸ Bo kehm soro yake arim ebo, tahm toono Jisos.

¹⁹ Á kehm jene mmokidi, song kpiri Jems, a Jon ba jolo abon Sibidi. Bo woomo egbang, jo baade arim ebo.

²⁰ Jisos kehm mahke bo. Bo kehm soro tahm nde ebo, a alokeltum ebe sa go egbang, tahm toono Jisos.

Nne no bele ebi etohko go ege atahng

(Luk 4:31-37)

²¹ Bo kehm song rehng go ejahbe ji bo jo lung re Kapenium. Efung Esabat Jisos kehm ba yel ekp'kpa ero kehm kehme eltibi.

²² Ane ba wuk-e no, kpo bo esi sehng tib go mbang nyi á jo tib. Á jolem ana at'tibi baka gana ba atahm. Á jo tibi area, ana nne no kpi nsahm.

²³ Nne no bele ebi etohko go ege atahng kehm soro lohng, ba yel ekp'kpa ero jio.

²⁴ Á kehm rabe tong Jisos re, “Jisos ji Nasaret, a ba jen ko go egahre? A ba re wo ba ranng-ra? N kp'kahne elkohn nne no a li no. A li mbarebara

nne no Esowo. Ebi ajehng ajehng wa wobem go ega eltim. A lohng goji Esowo ba.”

²⁵ Jisos kehm rabe tong ebi etohko jio re, “Rahke ewok, wo lohng nne noa!”

²⁶ Ebi etohko jio limi nne noo, á soro gbo ngbabohngo, fere rabe tiim, kehm soro lohng nne noo.

²⁷ Ane kpee ba jolo o, kpo bo esi area. Bo kehm kehme elbungu atemtem re, “Jen ji jo jol ana? Nkpokosi anyi a? A eltibi ni nfenfe ni! Nne noa kpi nsahm nyi abi atohko kpo wuk-e, á l'bung a bo.”

²⁸ Elgahm ni Jisos kehm yeere na yeere go nfam nyio nyi Galili kpee.

*Ana Jisos limi ane gbalee, bo nob
(Mat 8:14-17; Luk 4:38-41)*

²⁹ Jisos, Jems, a Jon, bo kehm lohngo go eksp'kpa ero jio asongo go etahk ji Pita a Andru lene no.

³⁰ Saimon, nnyehn nkal ewe noongo edilnong, jo yam arumbum. Jisos rehng kan a me, bo kehm-e tongo bada nnenkal noo.

³¹ Á kehm jeere kohl-e, song jabb-e go ebo, tabe yiimi. Á soro nob arumbum nyao. Nnenkal noo kehm tahme fvfo, kehme bo loko.

³² Elgung ba kan a me, ngare nyi njul ma lahm, ane kehm koko aneb ayam kpee, a aneb abi atohko ba goji Jisos.

³³ Ane kpee ba jolo ejahbe jio kehm ba nyo na nyo go mbutahk.

³⁴ Jisos limi aneb ayam gbalee, bo nob elkohn eyam abehng abehng, fere kam ane gbalee abi

atohko. Á taamem re, abi atohko nyao bung ejumjum.* Tibre bo jo k'kahn nne no Jisos li no.

*Ana Jisos bungu alum Esowo go Galili
(Luk 4:42-44)*

³⁵ Etoono efung behko Jisos kehm fungu atv atv tahm song rehng go edi ji li soom, song kak ero.

³⁶ Saimon, a atem bako go kehm tahme, kehm-e elsebe.

³⁷ Eji bo nyehn-e no, bo kehm-e tongo re, "Nsoo, ane kpée kp-a sebe."

³⁸ Jisos kehm faange re, "Wahr tahmen go abon ajahbe bako. M bahke tob bung alum Esowo tong bo. Tibre nya nya wahng ka m ba no."

³⁹ Á kehm mehle, kehme elyanng go Galili, jo bung alum Esowo go ntahk ero, fere kam ane abi atohko yehke go bo a ntim.

*Ana Jisos limi nne abili, á nob
(Mat 8:1-4; Luk 5:12-16)*

⁴⁰ Efung abehng nne abili kehm bake goji Jisos, ba gbo jamm-e alahng, kehm-e gboongo re, "L'fere kor-a, lim-m, me n nob."

⁴¹ Jisos, ndon kehm-e fili. Á kehm tanne ebo, koor-e, kehm-e tongo re, "Kor-m kor, wobnob."

⁴² Tvtv o nnenlum noo kehm soro nob abili nyao.

⁴³ Jisos kehm-e rehke t'tahne, fere tong-e re á song.

⁴⁴ Á kehm-e tongo re, "Wuungu atung, n kp-a tongo re, wo k'tiki tong nne awohng awohng jia ana! Song goji nlimajom, á feed-a, wo song lim njom nyi Moses tibi no, eji ane l'kahn re wobnob."

* **1:34 1:34** Elt 16:17-18

⁴⁵ Nne noo kehm tahme, kehm kehme eltiingi nkpokosi nyi m-e lim, tong ane edi ajehng ajehng. Á tooro area, kehn jol Jisos k'kpe ma lohng go nfam gbul gbul gbuul. Á jo fere jen eje adi nya li soom. Ane jo kpe lohng edi ajehng ajehng, song kpir-e.

2

Ana Jisos limi mbanne, á nob

(Mat 9:1-8; Luk 5:17-26)

¹ Kange kan abon afung ntiil, Jisos kehm feere ba ga Kapenium. Eka kehm yeere na yeere re, Jisos noa etahk.

² Ane kehm bake ba nyo, jol eyake ajehng ajehng kpeem jol go mbutahk ji nne bahke sehng yel ekp'kpa. Jisos kehm kehme bo nnoobo etib bio tiingi.

³ Ellong ane bako kehm kpe ba. Ane ani woomo go bo ellong o, ba solo mbanne, jo ba a ne goji Jisos.

⁴ Bo kahnem mbang nyi bo bahke sehng a ne rehng goji Jisos, tibre ane ruru sehng. Bo kehm lahme elbultahk, kanne alehke go edil-nong, kehm kehme eltahre, tete nne eyam noo song rehng edi ji Jisos jehk no.

⁵ Eji Jisos nyehne ana bo taame no tv-e, á kehm bungu tong mbanne nyio re, “Abiafem enya, me n tahm ka-a.”

⁶ At'tibi ba atahm bandiki ba ji o, kehm kehme eltiri go bo a ntim re,

⁷ “Jen ji wahng á ma daange Esowo, fere bung elkohn ellum ana nia? Nne awo bahke ma tahm

ka nne go ege abiafem? Esowo ntahngtahng bi bahke ma tahm ka nne go ege abiafem.”

⁸ Tvtv o Jisos kehm soro kahn ntir atahng abo, kehm bahbe bo re, “Jen ji wahnge á tiri ntir ana nyia?

⁹ Jen ji ga riidi, n l'tong mbanne nyio re, ‘Abiafem enya, me n tahm ka-a,’ afi n l'tong-e re, ‘Mehl, wo rod edilnong eja, tahm jen?’

¹⁰ M bahke lennge fvfo tib-n re, Mmon no nne kpi nsahm go njini nyia, nyi á bahke ma tahm ka nne go ege abiafem.”

¹¹ Owo wahnge Jisos kehm tongo mbanne nyio re, “Mehl, wo rod edilnong eja, song kehngel!”

¹² Bo kehm kehme elseenge. Nne eyam noo soro mehl tvtv, rod edilnong eje tahm.

Kehm kpoko bo esi, bo ane kpee. Bo kehme Esowo tehk re, “Elkohn ana nia, e ka nyehn a nyehn!”

Ana Jisos lungu Livai

(Mat 9:9-13; Luk 5:27-32)

¹³ Jisos kehm kpe lohng tahm go eto ji Galili. Ane kpee kehm bake go ege. Á kehm kehme bo tib.

¹⁴ Eji á kp'sehnge egbuk eto jio, á kehm nyehne Livai, mmon no Alfeus, jehk go ege edi eltum, kpi akpohko etak ko. Jisos kehm bungu tong-e re, “Tahm toon-m me!”

Livai kehm mehle fvfo toon-e.

¹⁵ Eji Jisos, a abat'toono ebe jo li nsol go etahk Livai, abakokatak, a aneb abiafem gbalee tob jolo o fvfo, jo li nsol. Tibre ane gbalee ba jo toon-e.

¹⁶ Eji ellong at'tibi ba atahm, ba bo jo lung bo re Farisis nyehne Jisos kp'lehke nsol a abakokatak, a aneb abiafem, bo kehm bahbe abat'toono ebe re, "Jen ji wahnge á kpo li nsol a abakokatak, a aneb abiafem?"

¹⁷ Jisos wuku kan bo, á kehm faange re, "Ane ba li nob nob kpehme seb nlimakahm, sehngem bao ba kp'yame ba kpo seb nlimakahm. M baam re me m ba lung anobonobo ane, m ba re me m ba lung aneb abiafem."

Mbahbe nyi li bada njal abade

(Mat 9:14-15; Luk 5:33-35)

¹⁸ Efung abehng abat'toono Jon, a ba Farisi jo bade elbo njal. Bo kehm bake goji Jisos, ba bahbe re, "Jen ji wahnge abat'toono Jon, a abat'toono Farisis kpo bade elbo njal, abat'toono eba kil jo tob bade elbo ano?"

¹⁹ Jisos kehm bahbe bo re, "N'nob re ane ba bo ma tiingi bo elkak elbal, bo ji njala? Eji nfono elkak kpeke li na, bo nehm ma bade elbo njal.

²⁰ Ngare kp'bake nyi bo bahke koko nfono elkak tahm a ne. Ngare nyio l'rehng, owo bo bahke kehme elbo njal bade.

Eltibi ni mahne mahne l'li, eltibi ni Jisos l'li

(Mat 9:16-17; Luk 5:36-39)

²¹ "Nnene limm, no bahke koko mmojang mbomo no nfenfe song baade nk'kula mbomo. Á l'lim ano, mmojang mbomo no nfenfe nehm yiimi. Nk'kula mbomo mio bahke kpe kv na edi jio budu sehng ana wuku wuku.

²² Nnene limm, no bahke yaange amahm ma kp'fahle, kak go nk'kohko eyahbe. Á l'lim ano,

eyahbe jio bahke bahnge na, amahm sale. Nobo re nne ko amahm ma kp'fahle, yaange kak go eyahbe nfenfe.”*

Mbahbe nyi li bade efung Esabat

(Mat 12:1-8; Luk 6:1-5)

²³ Efung Esabat Jisos jo jene go emahng ji bo ma bahm nkohl. Eji abat'toono ebe jo toon-e, bo kehm kehme amohk nkohl monngo tv go arahn.

²⁴ Bab Farisi kehm bahbe Jisos re, “Jen ji wahnge abat'toono eba kp'limi ejum ji ki fuumu re nne lim efung Esabat?”

²⁵ Jisos kehm faange bo re, “Wahn ka tiki lung bade ana Devid limi noa, eji nfem gbo tub-ea, á song seb nsol alehke lia, ye, a ane ebea?

²⁶ Á yele ekp'kpa Esowo, song li abred nya bo limi bum go esamahr Esowo. Jia ana limi ngare nyi Abiatar jolo ntubesi abalimajom. Ntahm enyahre li re, abalimajom ba ba fuumu re bo jo li abred nyao. Devid li abred nyao, fere faake erik ka ane ebe, bo tob li.”

²⁷ Jisos kehm bungu tong bo re, “Esowo limi efung Esabat ka nne. Á limem nne ka efung Esabat.†

²⁸ Mmon no nne tob li nfono Esabat.”

3

Nne no ebo ebe lohngo no

(Mat 12:9-14; Luk 6:6-11)

¹ Jisos kehm kpe feere go etahk ero. Nne jolo o, no ebo ebe lohngo no.

* 2:22 2:22 Rom 7:6 † 2:27 2:27 Rom 14:5; Kol 2:16-17; Gal 4:10-11

² Ane ba jolo o jo kpuru Jisos, joare á bahke limi nne noo, á nob efung Esabat. Tibre bo jo sebe ejum ji bo bahke kake Jisos ebi.

³ Jisos kehm bungu tong nne no ebo ebe ma lohng re, “Mehl, wo jeere ba!”

⁴ Jisos kehm bahbe ane bako re, “Ejum aji atahm enyahre bungu re nne jo lim efung Esabat? Á jo kak nne eboa, afi á jo ranng na? Á tahre elkpín nnea, afi á ranng elkpín nne?”

Jol ejumjum bo we faangem.

⁵ Jisos, atahng kehm-e rake, eji á mehle no jang. Ndon kehm-e fere fili bada bo. Tibre bo bele etahnsi. Á kehm tongo nne noo re, “Tanne ebo eba!”

Á kehm tanne ebo ebe, lohko nob tvtv.

⁶ Bab Farisi kehm lohngo ekp'kpa ero jio o, kehm song kpíri alokeltum ntul a Herod. Bo kehm toobo ana bo bahke limi, kehm wulu Jisos.

*Ellong ane ba jolo go nkpe eto
(Luk 6:17-19)*

⁷ Jisos kehm tahme eje, a abat'toono ebe go eto ji Galili. Ellong ane tvv t'toono bo.

⁸ Ane bao lohngo go Galili, Judea, Jeusalem, a Idume, go egbuk jehko ji Jodan, fere lohng go abon ajahbe ba li senng Taya abola Saidon kak. Ellong ane gbalee ba goji Jisos, tibre bobwuk ana á kp'limi.

⁹ Jisos kehm tongo abat'toono ebe re bo toobo egbang bum-e, eji ane l'ki-e fahd kak.

¹⁰ Tibre á limi ane gbalee, bo nob ayam ebo. Owo wahnge aneb ayam bao kpee jo temme atemtem re bo song koor-e ebo.

¹¹ Abi atohko l'nyehn Jisos, bo jo gb'gbo jamm-e alahng, fere jo rabe tiim re, "Wo wo li Mmon no Esowo!"*

¹² Jisos kehm rehke abi atohko nyao t'tahne re, bo k'tooro tong ane elkohn nne no ye li no.

*Ana Jisos yehke ewubu ane abal, bo jo toon-e
(Mat 10:1-4; Luk 6:12-16)*

¹³ Jisos kehm tahme go ewong ajehng, song lung ane bao ba á kp'sebe. Bo kehm bake.

¹⁴ Á kehm yehke ewubu ane abal, fere tong bo re, "M ma-n yehke re wahn jol a name. M bahk-n tumu re wahn song bung alum Esowo.

¹⁵ Fvfo m bahke bele nsahm nyi m bahke jo kam abi atohko."

¹⁶ A wo li ewubu ane abal ba á yehke no, Saimon ji Jisos ka-e mbing nyehko re Pita,

¹⁷ Jems, a Jon, bo jolo abon ba Sibidi. Jisos ka bo abing nyako re Boanerges ji lohngo re, "abon ba li ana ndan",

¹⁸ Andru, Filip, Batolomi, Matiu, Tomos, Jems ji mmon no Alfeus, Tadeus, Saimon ji jo seb re ejahbe eje lohng go elwo ni aneb Rom,

¹⁹ go Judas Iskariot ji gungu Jisos.

*Jisos abola ntul a nnehm
(Mat 12:22-32; Luk 11:14-23; 12:10)*

²⁰ Jisos, a abat'toono ebe, bo kehm feere kehng go etahk. Ellong ane kehm kame na kam song rur. Jisos, a abat'toono ebe belem eyake ji bo bahke lehke nsol.

* **3:11 3:11** Jems 2:19

²¹ Ane ebe wuku kan a me, bo kehm bake re bo ba ko-e tahm a ne. Tibre bo jo bungu re, “Yebgbo esahl!”

²² At'tibi ba atahm bandiki ba lohngo go Jeusalem ba, kehm bungu re, “Á kpi etohko ji nnehm go ege eltim. Ntul a nnehm wo ka-e nsahm nyio re á jo kam ane abi atohko yehke.”

²³ Jisos kehm lungu ane bao tv elne, kehm tuubu ngaane tong bo re, “Nnehm bahke ma kam elne renan?”

²⁴ Ejahbe l'yab, jol ebo ebo, ejahbe jio bahke tane.

²⁵ Nnahb l'yab, jol ebo ebo, nnahb nyio bahke tane.

²⁶ Eblehm l'kehme elnoko atemtem, ejahbe ebo l'yab, bahke tane.

²⁷ Nnene limm, no bahke ma wa mbutahk yel go etahk etahntahn nne, song kpu nsol enye kpee, sehngem re no, á tohko gbo mbang gba etahntahn nne noo alehke, kehm ma yel ege ekp'kpa, song seb ajehng ajehng ji kor-e no rod.

²⁸ “Etingitingi, n kp-n tongo re, Ane bahke ma bel eltahmeka kpee go bo abiafem, a elsuku ni bo kpo su Esowo,

²⁹ wo, nne awohng awohng no l'fere lim abiafem, su Etingi Etohko, á nehm tiki bel eltahmeka go njinanjini. Abiafem nyao we nehm tiki laade go njinanjini.”†

³⁰ Jisos bungu jia, tibre ane tvv jo tongo re, “Á kpi ebi etohko.”

*Nnyehn Jisos, a abonanyehn Jisos
(Mat 12:46-50; Luk 8:19-21)*

† 3:29 3:29 Jon 16:9

³¹ Nnyehn Jisos, a abonanyehn Jisos kehm bake. Bo yiimi go elatahk, tum re bo lung-e.

³² Ellong ane tvv ji sennge Jisos kak. Bo kehm-e tongo re, “Nyehnee, nne, a abonane ebba yiimi go elatahk kp-a sebe.”

³³ Jisos kehm faange re, “Nne awo li li nnee? Ane aba li li abonanee?”

³⁴ Á kehm tabe esamahr wahre, jang ane kpee ba ji senng-e kak, kehm bungu re, “Nyehnen, a wo li babnnee, a abonanee.

³⁵ Nne awohng awohng no l'lim ji Esowo kp'sebe re á lim, ye wo li mmonanee, a nnee.”

4

Elgan ni li bada mbahmgbe

(Mat 13:1-9; Luk 8:4-8)

¹ Jisos kehm kpe tahm go eto ji Galili song tib ane. Ellong ane ni ba yiimi senng-e kak, gbale sehng. Owo á kehm song yel go egbang bi woomo go alahb, ellong ane jol ga nkpe egbuk.

² Á jo ko ngaane, tib bo nsol tvv. A wo li eltibi ene ni á tibi bo re,

³ “Wuungen atung! Nne jolo gona, no tahme re á song wohngo amohk nti enye.

⁴ Eji á tahme no re á song wohngo amohk nti go ege egbe, nyandiki gbo noongo go mbang. Nruk ba suudu kpee mele.

⁵ “Nyandiki gbo noongo go ndi nyi li atal atal. Abon ndi jolo ntiil. Amohk nti nyao gulu elmahng-e. Tibre edi jio, ndi gbalem.

⁶ Njul nyaare kan a me, akohdo nti nyao wuudu, fere kpo. Tibre alohk jolem.

⁷ “Nyandiki gbo kuumu elkob akpiri. Akpiri nyao gbale na, bulu akohdo nti nyao, kabem.

⁸ “Amohk nti nyako gbo noongo go nnooba ndi, kehm mahnge, fere gbal arahn, kab. Atasok nyandiki jo jolo eltahl a nkab ewubu eltahl a nkab ewubu, atasok nyandiki nkab atahl ara ara, atasok nyandiki nkab atahl alon alon.”

⁹ Jisos kehm bungu re, “Wuungen atung! Nne no kpi atung, nong á wuk!”

Ji wahng ka Jisos jo t'tuubu ngaane

(Mat 13:10-17; Luk 8:9-10)

¹⁰ Eji Jisos jolo ntahngtahng, egom jindiki, a abat'toono ebe kehm song ji senng-e kak, kehm-e bahbe bada ngaane enye.

¹¹ Jisos kehm faange re, “Wahn, boblenng nso ni li bade etul bi Esowo ka-n, nyi Esowo behre no. Ngare anyehng anyehng egom jehko jo wuku ngaane nyi nyi.

¹² “ ‘Re bo seenge na seenge seenge, jol bo nehm tiki nyehn.

Re bo wuk na wuk wuk kak atung,
jol bo nehm tiki kahn,
eji bo l'k'gbo ndon,
feere goji Esowo,
fere bel eltahmeka.’ ”*

Ana Jisos lennge elgan ni li bada mbahmgbe

(Mat 13:18-23; Luk 8:11-15)

¹³ Jisos kehm bahbe bo re, “Elgan nia wahn lenngema? Bahke limi renan, n' kehm kahne ngaane nyehko nyi m bahke kpe tuubu?

* **4:12 4:12** Jon 12:40; 2 Kor 4:4

14 “Mbahmgbe noo tahme song wohngo alum Esowo.

15 “Ane bandiki li ana amohk nti nya gbo noongo go mbang. Bo l'wuk alum Esowo, nnehm soro ba tvtv, ba yehke etib bio go bo a ntim.

16 “Ane bandiki li ana amohk nti nya gbo noongo go ndi nyi li atal atal. Bo l'wuk alum Esowo, bo ko tvtv a eyebatahng.

17 Nehm yel rahbe go bo a ntim, lim alohk. Jol nehm tohko k'kang, erem l'ba, a ntong go alum Esowo nya bo wuku no, bo soro gbo tvtv.

18 “Ane bandiki li ana amohk nti nya fooro gbo go elkob akpiri. Bao ba li ane ba kpo wuk etib bio O.

19 Gana, nsol nyi njini nyia kpi bo gbiingi go bo a ntim. Ekor akpohko kp'nehme bo. Bo fere jo nok, eji bo l'bel ejum ajehng ajehng ji bo ki kpi. Nsol nyia kpee bahke rake yel go bo a ntim, bulu alum Esowo tv. Akab nehm kab.

20 “Ane bako li ana amohk nti nya bo wohngo go nnooba ndi. Bo l'wuk alum Esowo ko, bo fere kab akab, egom jindiki eltahl a nkab ewubu eltahl a nkab ewubu, egom jindiki nkab atahl ara ara, egom jindiki nkab atahl alon alon.”

Et'rekahng ji bo konngo ejeere

(Luk 8:16-18)

21 Jisos kehm kpe soro asi re, “Nne ebk'ko et'rekahng ba a jia, ba nyaala, fere rod ejeere konnga, afi á bum go nla eksp'kuru? Á kpo rod kunu go edi ji li gbuul.

22 Ajehng ajehng ji bo behre no, bo bahke koko ba edi ji li gbuul. Ajehng ajehng ji bo bulu no, bo bahke tiki lennge.

²³ Wuungen atung! Nne no kpi atung, nong, á wuk!"

²⁴ Fvfo, á kehm bungu tong bo re, "Kunen ekpu go ajehng ajehng ji n kpo wuk. Mbang ny'nehm nyi n kpo lam ane bako, ny'nehm nyi Esowo bahke tob lam-n. Elam ji Esowo bahke gbale sehng, fere s'sab.

²⁵ Nne no kpi no, Esowo bahk-e kpe budu na. Nne no kpi ntiil, Esowo bahk-e gohro taare na, no á kpi no."

Elgan ni li bade amohk nti nya gbale antahng

²⁶ Jisos kehm bungu re, "Etul bi Esowo li ana nne no song wohngo amohk nti go ege egbe.

²⁷ Á jo kono elnoongo lal ngare atv, fere nyahme efungfu. Amohk nti nyao mahng, fere gbal. Á kahnem ana limi lim.

²⁸ Ndi nyi kpo lim antahng re nsol mahng, fere gbal, kab akab.

²⁹ Ngare nyi nti nyio ma kab, nne noo bahke koko ebgbagodo, song bong. Tibre ngare elbongo ebrehng."

Elgan ni li bada mmohk asia

(Mat 13:31-32; Luk 13:18-19)

³⁰ Jisos kehm bahbe re, "E bahke bungu renan bade ana etul bi Esowo li no? Elgan ani e bahke koko lennge?

³¹ Li ana mmohk asia nyi sahb s'se go njini nyia sehng mmohk eti anyehng anyehng.

³² Nne kehm rodo bahm go ndi. Kange kan a me, kehm gbale sehng elrahnti anehng anehng, jamme agburu ab'bo, nruk ba si ntahk."

³³ Jisos jo bungu alum enye gbalee go ngaane ana elgan nia. Á jo bungu, eji bo l'mal elwuku.

³⁴ Á jo tiki bung a bo go ngaane. Á l'jol ntahngtahng, a abat'toono ebe, á jo lennge ajehng ajehng tong bo.

*Ana Jisos bungu tong nfeb, a ebuku naange
(Mat 8:23-27; Luk 8:22-25)*

³⁵ Efung b'nehm ona, ngare elgung, Jisos kehm tongo abat'toono ebe re, "Wahr siiren eto jia, rehng go egbuk jehko."

³⁶ Bo kehm yake ellong ane bao. Abat'toono ebe kehm tahme yel egbang. Ngare nyio Jisos ebyel. Agbang nyako tob jolo o fvfo.

³⁷ Nfeb nyi kp'tahne kehm bake. Ebuku kehm kehme ellimi. Alahb kehm jo kim, yel egbang, ba elruru.

³⁸ Jisos noongo go nnahb egbang jo lal. Á kunu esi go etisi. Abat'toono ebe kehm-e nyahme re, "Nt'tibi, wa nehme luba, wahr ga yahke tano?!"

³⁹ Jisos kehm mehle yiimi, kehm bungu t'tahne, tong nfeb re, "Rahke!" Á kehm fere tong ebuku re, "Goomo!" Nfeb nyio kehm rahke. Edi kehm naange soom.

⁴⁰ Jisos kehm fere bung tong abat'toono ebe re, "Jen ji n kp'fahle ana? Jen ji wahng ka n kil-m elbumu go etingitingi?"

⁴¹ Tibre bo fahle sehng. Bo kehm kehme elbungu atemtem re, "Anv, elkohn nne awo anae, no kpo bung tong nfeb, a ebuku, wuk-e?"

5

*Ana Jisos limi nne no bele ebi etohko, á nob
(Mat 8:28-34; Luk 8:26-39)*

¹ Bo kehm rehng go egbuk eto jehko go ejang bi Gerasa.

² Jisos lohngo kan go egbuk, á kehm soro wane nne no lohng go edi ji alam akvne jolo no. Nne noo ona bele ebi etohko go ege atahng.

³ Á lene go alahm akvne. Nnene we kpeem ma kak agbekobo.

⁴ Nkpel tvv bo jo kak-e agbekobo. Ngare anyehng anyehng nyi bo gba-e no, á tohng nya abo kiimi, fere ruumu nya akpade kiimi. Nne ne jolem, no jo mal gon-e.*

⁵ Atv a njul á jo yanng go alahm akvne, a awong, jo rabe tiim, fere jo rod atal, jo kadde elne, yehke alok.

⁶ Á jolo fee, eji á nyehne Jisos. Á kehm beke ba gbo jamme Jisos alahng,

⁷ kehm rabe tiim re, “Jisos ji Mmon no Esowo bi li go ero, a ba jen go egame? Tib go esi ji Esowo m ma-a gboongo re, wo ki-m kak erem!”

⁸ Á bungu jia, tib eji Jisos m-e tohko tong re, “Ebi etohko lohng-e!”

⁹ Jisos kehm bahbe ebi etohko jio re, “Mbing enya mee?”

Á kehm faange re, “Mbing enyame li re ‘Egomegom’. Tibre e li go egom.”

¹⁰ Á kehm soro gboongo Jisos re, á k'kam bo yehke go ejahbe jio.

* 5:4 5:4 Elt 19:16

¹¹ Ellong akuk jolo o kpidi kpidi, jo li nsol go ewong.

¹² Abi atohko nyao kehm kehme Jisos gboongo re, á lub tum bo, bo song yel akuk nyao go atahng.

¹³ Jisos kehm taame. Abi atohko nyao kehm soro yake nne noo abo, tahm song yel akuk nyao go atahng. Bo kehm beke song fooro agbung-bung gbo yel go alahb tan. Kpee ellong akuk nio o jolo akuk atahltahl nkpel elon (2,000).

¹⁴ Ane ba jo baabe akuk nyao, be ebo tahm, song tiingi go etahk, a abon ajahbe bako fvfo. Ane bao kehm lohngo re bo song nyehn ji ma lim.

¹⁵ Bo kehm bake goji Jisos, ba nyehn nne no bele ellong abi atohko go ege atahng. Á jehk eje sange sange, fere kak nsol go ngubjing. Bo kehm kehme elfahle.

¹⁶ Ane ba nyehne no, kehm song tong ane bako ji ma lim nne no bele abi atohko, a ji ma lim akuk.

¹⁷ Bo kehm tongo Jisos re, á tahm ejahbe jio.[†]

¹⁸ Eji Jisos yele egbang, nne no bele abi atohko kehm jo gboong-e re, “Nong, me n toon-a, wahr tahm!”

¹⁹ Jisos taamem, á tong-e re, “Feere song goji ane eba, wo song tong bo ana ji Ntul ma lim ka-a, ana a ma fili Esowo ndon.”

²⁰ Nne noo kehm tahme jo yannge go ejahbe na ebwubu bi bo jo lung re Dekapolis, jo tooro ji Jisos ma lim ka-e.

Ane bao kpee ba wuku no, kpo bo esi area.

Mmon a Jairus abola nnenkal no koro Jisos ebo go ege a nsubu

(Mat 9:18-26; Luk 8:40-56)

[†] 5:17 5:17 Jon 4:40

21 Jisos kehm yele egbang, feere egbuk eto jehko. Owo ane kame no ba rur senng-e kak. Á jolo kpidi kpidi go nkpe eto.

22 Ntubesi awohng go ellong atubesi ba etahk ero, no bo jo lung-e re Jairus kehm bake. Á nyehne kan Jisos, á kehm gboko jamm-e alahng go alata,

23 kehm-e gboongo gbalee re, “Mmon ewame yahke kpo, titi, ba wo ba kun-e ebo go esi, eji á l'nob, fere bel elkpín.”

24 Jisos kehm soro tahm toono Jairus. Ellong ane tvv jo tob toono bo go njahm. Bo jo gbulu na gbul atemtem mbang mbang.

25 Nnenkal awohng jolo o, no alung sa-e nnahb ewubu a nnya ebal.

26 Á jo nyehne erem sehng, eji abalimakahm tvv jo lim-e akahm. Á ranng akpohko enye kpee re á nob eyam bio, eyam jo kpe-e nyede na.

27 Á wuku bada Jisos. Owo á kehm jene a ellong ane ba jo toono Jisos go njahm, ba koro nsubu enye.

28 Tibre nnenkal noo bungu go ege eltim re, “N l'lub koor-e na koro go ege a nsubu, m bahke nobo.”

29 Á kehm soro koro nsubu enye. Alung eme soro mal. Á kehm soro kahn tvtv re, yeblohko nob eyam ebe.

30 Tvtv o Jisos kehm soro kahn re, nsahm m-e tele lohng. Á kehm keebe seenge ellong ane bao, kehm bahbe re, “Nne awo ma-m koro go egama nsubu?”

³¹ Abat'toono ebe kehm faange re, "A kp'nyehne re, ane ebrur sehng, gana a kp'bahbe re, nne awo ma-m kooro!"

³² Tvtv o Jisos kpi njange njange re á nyehn nne no koor-e no.

³³ Nnenkal noo kehm soro kahn ji ma lim go ege a ngubjing, kehm bake goji Jisos a elfahle, a ekahme akahb, ba gbo jamm-e alahng, kehm-e soro tong etingitingi kpee.

³⁴ Jisos kehm tongo re, "Nnenkal, eltaame ena ebwahng ka wobnob. Song go eyebatahng! Woblohko nob eyam eba."

³⁵ Eji Jisos jo bung jia, ane bandiki kehm soro lohng go etahk ntubesi etahk ero noo, kehm ba tong-e re, "Mmon ewa ebkpo. Jen ji wahng ka a kp'kpeke gbiingi nsoo?"

³⁶ Jisos wuungem atung a jio ji bo bungu no. Á kehm tongo ntubesi no re, "Ka fahl, taame na taame!"

³⁷ Jisos taamem re, nnene toon-e, sehngem Pita, Jems a Jon ji mmonannyehn Jems, bo ba, á taame re bo toon-e.

³⁸ Bo kehm soro rehng etahk ntubesi noo. Jisos kehm nyehne egom jehko ji kp'lingi, fere nyehn bako ba kp'kake agohrobi, fere jo jokko na jokko edi.

³⁹ Á kehm maade yel go ekp'kpa, song tong bo re, "Jen ji wahnge n kp'limi ana? Jen ji wahnge n kp'l'ling? Mmon noa ka kpo. Á kp'lale na."

⁴⁰ Bo kehm-e kehme elwolo. Á kehm nyame bo re, bo lohng elatahk. Owo á kehm lungu nde mmon, fere lung nnyehn mmon, a abat'toono ebe, ane ara ba toon-e no.

Bo kehm yele eksp'kpa jio ji mmon noo noongo no.

⁴¹ Jisos song jabbe mmon noo go ebo, kehm bungu tong-e re, “Talita kumi,” ji lohngo re, “Mmon ewame, n tong-a re, wo mehl yiimi.”

⁴² Á kehm soro mehl tvtv, soro kehme el-jene yanngé. Ngare nyi nkpokosi nyio limi no, yebkang ewubu a nnya ebal. Kpo bo esi area.

⁴³ Jisos kehm bungu t'tahne re, bo k'tong nnene. Á kehm soro bung re, “Kaan ye nsol alehke, á li!”

6

Ana aneb Nasaret tene Jisos (Mat 13:53-58; Luk 4:16-30)

¹ Jisos kehm tahme edi jio, song rehng go ege ejahbe, a abat'toono ebe.

² Efung Esabat á kehm song tib go eksp'kpa ero. Ane gbalee jolo o. Eji bo wuk-e no, kpo bo esi area. Bo kehm bahbe re, “Gan wo á bele nyaa? Á limi renan, kehm bele elkahne ana nia?*” Á kpo lim renan, kehm limi akpokosi nyaa!

³ Ye sang li ekapentaa, ji li mmon a Meria? Ye sang li mmonannyehn a Jems, Joses, Jud a Saimona? Abonanyehn ba nkal sang lene aa?” Ano wo wahnge bo kehm-e tene.

⁴ Jisos kehm bungu tong bo re, “Nnyehnamahr Esowo, bo kpo kak-e edi ajehng ajehng, sehngem re nnahb enye, ejahbe eje, a etahk eje ji kil jo kak-e.”

* 6:2 6:2 Jon 7:15; Elt 4:13

⁵ Á maam lim nkpokosi anyehng anyehng o, sehngem re abon amohk ane ntiil ba jo yam ba á kunu bo ebo, bo nob.

⁶ Jisos, kpo-e esi area, eji ejahbe eje ki taame.

Á kehm kehme elyanng go abon ajahbe ba jolo senngé ona, kehme bo tib.

*Ana Jisos tumu abat'toono ebe, ewubu ane abal
(Mat 10:5-15; Luk 9:1-6)*

⁷ Jisos kehm lungu abat'toono ebe, ewubu ane abal tv edi ajehng, kehm tumu bo ane abal abal. Á ka bo nsahm re bo kam ane abi atohko yehke.

⁸ Á bungu tong bo re, “Kana fili ejum ajehng ajehng, sehngem ntifilibo nyi nyi n̄ bahke fili. Kana fili nsol alehke! Kana fili abam! Kana kak akpohko go egahne abam!

⁹ Kaken akpaketa! Kana fili mbomo ebal ebal!”

¹⁰ Á kpe tong bo re, “N̄ l'je, jolen a ane bao ba tong-n no re wahn kang go bo a ntahk. Kana yaange etahk jimongo tete n̄ tahm ejahbe jio.

¹¹ N̄ l'fere je ejahbe ji ane l'ki-n vvr̄v, k'fere wuung-n atung, lohngén ejahbe jio o, wahn kum akpade. Jia bahke jolo ana elliingi ka bo.”

¹² Bo kehm lohngo song bung alum Esowo re, ane gbo ndon go bo abiafem.

¹³ Bo kame ane abi atohko yehke gbalee, fere jo taame aneb ayam akehng, bo jo nob.

*Ana Jon ji nwohngalahb kpo no
(Mat 14:1-12; Luk 9:7-9)*

¹⁴ Ntul a Herod kehm wuku bada nsol nyia kpee. Tibre elgahm ni Jisos ebyeere gbalee. Ane bandiki jo bungu re, “Jon ji nwohngalahb

ebnyahme go elkv, fere jol go elkpin. Owo wahng ka nne noo kpi elkohn nsahm ana nyio, fere kp'limi akpokosi."

¹⁵ Ane bandiki jo fere bung re, "Elaija wo a." Ane bandiki jo bungu re, "Nnyehnamahr wo, ana aj'jok anyehnamahr Esowo ba jolo go nk'kula ngare."

¹⁶ Herod wuku kan a me, á kehm bungu re, "Jon ji nwohngalahb wo, ye ji n kim-e esi. Yebkpe fere nyahme."

¹⁷ Tibre nyanjehle Herod t'tum re bo bob Jon ba a ne, ba gba-e kak go ngbekobo. Herod limi jia tib go esi ji Herodias ji á taare Filip mmonannyehn.

¹⁸ Jon ji nwohngalahb jo tongo Herod re, "Nobem re wo baange nkal a mmonanne."

¹⁹ Herodias kehm kehme elmarre a Jon. Á bele erakatahng re á bahk-e wulu. Á malem.

²⁰ Tibre Herod jo fahle Jon, tib eji á jo kahn re, Jon jolo etingitingi nne Esowo. Herod jo sebe re á tahre elkpin ene. Jo kor-e re á jo wuungu atung go alum nya Jon, jol eji alum nyao jo gbiing-e gbiingi, fere ka-e at'tiiri go eltim.

²¹ Efung elbuumu bi bo jele Herod, Herodias kehm bele eyake. Tibre Herod tiingi atul elkak, fere tiingi atubesi nsoja, a anebkul nfam ba Galili.

²² Mmon a Herodias no nkal kehm lohngo ba yel, kehm kehme ese bahn. Kehm yebe ntul a Herod atahng, a ane ebe. Á kehm bahbe mmonse noo re, "Jen ji a kp'sebe re me n ka-a! M bahk-a kake ajehng ajehng ji a sebe no."

²³ Herod kehm nyame, fere t'tir re, "Aje hng aje hng ji a l'bahb-m, m bahk-a kake, jol afi ejang afang ejame ji, m bahk-a kak."

²⁴ Mmon noo kehm soro lohng tahm, song bahb nnyehn re, "Jen ji m bahk-e bahbe?" Nnyehn kehm faange re, "Esi ji Jon ji nwohngalahb."

²⁵ Mmon noo kehm feere elwaare elwaare, ba goji ntul, ba tong-e re, "N kp'sebe re, wo ka-m esi ji Jon go ekpingi."

²⁶ Jia limi ntul, á kehme elguunu. Á kpeem ma ten, tib eji á ma tohko nyam ano, fere tir go esamahr ane kpee.

²⁷ Á kehm soro tum nlokeltum ewe na awohng re á song kim Jon esi ba a ji.

²⁸ Nlokeltum noo kehm soro tahm, song rehng go ekp'kpa ngbekobo, song kim Jon esi, kak go ekpingi, ba ka mmon noo. Mmon noo kehm soro rod fvfo, song ka nnyehn.

²⁹ Abat'toono Jon wuku kan a me, bo kehm song rod ekv eje, song kpa kak go ndi.

Ana Jisos le ellong ane gbalee (5,000)

(Mat 14:13-21; Luk 9:10-17; Jon 6:1-14)

³⁰ Abatiingetib Jisos kehm feere ba kpir-e, ba kehm-e nsol tong nyi bo ma lim kpee, fere t'tib.

³¹ Etahk ji Jisos jolo no, ane bako jo yele na, egom jehko jo lohng. Jisos, a abat'toono ebe belem ngare nyi nsol alehke. Á kehm bungu tong bo re, "Wahr tahmen go edi ji li soom. Go wo m bahke ma re ekv."

³² Bo kehm yele go egbang tahm go edi ji li soom.

³³ Ane gbalee nyehne bo eji bo tahme no, fere liingi bo. Owo ane kehm lohngo ajahbe nyao kpee, jo jen egbuk egbuk, gbo mbang song rehng edi jio, Bab Jisos kehm rehng.

³⁴ Jisos lohngo kan egbang, á kehm nyehne ellong ane gbalee. Ndon kehm-e fili. Tibre bo jolo ana ejoro bi ki kpi mb'baabe. Á kehm kehme bo nsol tib gbalee.

³⁵ Eji atv yahke behde, abat'toono ebe kehm bake, ba bung tong-e re, "Tahm edi jia ana rehng go ajahbe, ekidi kp'labe, gana, atv yahke behde.

³⁶ Tum bo, bo song go abon ajahbe ba li a kpidi kpidi, song gunu nsol alehke."

³⁷ Jisos kehm faange re, "Wahn kaan bo nsol alehke, bo li!" Bo kehm-e bahbe re, "A kp'sebe re, wahr song gunu nsol go mpon atahl alon, ba le boa?"

³⁸ Jisos kehm bahbe bo re, "Ebred ebbik n kpi no? Song kpuren!" Eji bo ma song kpur, bo kehm bake, ba tong-e re, "Ebred eblon, kunu abon nsahre abal."

³⁹ Jisos kehm tongo ane bao re, bo ji ag'gabe ag'gabe go ajele nya kp'na kohdo.

⁴⁰ Bo kehm jehke. Nlong nyindiki jo jolo ane atahl alon alon. Nlong nyindiki jo jolo ane atahl abal ane awubu, ane atahl abal ane awubu.

⁴¹ Jisos kehm rodo ebred eblon bio, a abon nsahre abal, seenge go elbung, kak Esowo saam, kehm bakke abred nyao, ka abat'toono ebe re bo ko song bak bo. Fvfo, á kehm kpe bakke abon nsahre bao na abal, bo tob song bak bo kpee.

⁴² Bo kpee li wohngo.

⁴³ Abat'toono ebe kehm taare erik abred nyao, a nsahre, kak ajeere, ruru ewubu ejeere ebbal.

⁴⁴ Aneblum ba li abred nyao jolo ane atahltahl nkpel ewubbal ane atahl awubu (5,000). Anebkal, a abonse, bo fangem bo.

*Ana Jisos jene go ero alahb
(Mat 14:22-33; Jon 6:15-21)*

⁴⁵ Tvtv o Jisos kehm soro tong abat'toono ebe re, bo yel egbang, gbo-e mbang, song egbuk jehko ji Betsaida, yefono ji, jo yaame ane.

⁴⁶ Eji á ma tong ellong ane bao re bo song kehng, á kehm tahme go ewong re á song kak ero.

⁴⁷ Eji elgung ma ba, egbang bio jolo go nlum alahb. Jisos sa ntahngtahng go ewong.

⁴⁸ Jisos kehm nyehne re, abat'toono ebe ebbel nfem go egbang, nyi jo lim bo re, bo k'ma kpe fing egbang. Tibre nfeb jo gbulu bo, feere njahm njahm. Eji ma rehng ejum nkaranka eni nyi efungfu, Jisos kehm kehme eljene go ero alahb asongo goji bo. Á jo jene, are á yahke sehng bo.

⁴⁹ Bo kehm-e nyehne, á kp'jene go ero alahb. Bo tiri re, etohko ji. Bo kehm kehme elrabe.

⁵⁰ Eji bo kpee nyehn-e no, bo kehm kehme elfahle. Jisos kehm soro tong bo re, "Me wo, kana kpe fahl! Boben eltim!"

⁵¹ Á kehm ba yel egbang. Nfeb kehm soro rahke. Abat'toono ebe kpo bo esi sehng.

⁵² Bo kahnem ana abred nyao lohngo no. Tibre jolo bo ekpehlekpehle.

*Ana Jisos limi aneb ayam nob go Galili
(Mat 14:34-36)*

⁵³ Bo rehngre kan egbuk eto jehko, edi ndi ji bo jo lung re Genesaret, song kahn egbang ebo.

⁵⁴ Bo lohngo kan a egbang me, ane kehm soro liingi Jisos.

⁵⁵ Bo kehm tahme, yel nkpohko ejahbe anyehng anyehng, jo sol aneb ayam go ebkpa, ba edi ajehng ajehng ji bo l'wuk re Jisos ebrehng o.

⁵⁶ Ajahbe nya nnen, a ajahbe nyi ki ga gbal, a abon ajahbe ba nse, ane gbalee jo ko aneb ayam ebo, je go are, fere gboongo Jisos re á lub taame, bo koor-e go ege as'sili nsubu. Ane kpee ba jo koor-e, jo l'lohko nob.

7

Eltibi ni anebkul Jus tibi no

(Mat 15:1-9)

¹ Bab Farisi, a at'tibi ba atahm bandiki kehm lohngo go Jeusalem ba goji Jisos.

² Bo nyehne re, abat'toono Jisos bandiki joom kpe ru abo go mbang nyi at'tibi ba atahm jo kono eltibi, kehm lehke nsol.

³ Farisis, a Jus kpee joom tiki li na li nsol, k'ru abo. Tibre bo jo toono eljini ni babnde ebo jo tib bo.

⁴ Bo l'je are feere, bo nehm tiki li nsol, bo tohko tiki bum elbo saang. Bo jo toono eljini nehko go fvfo, nio ni babnde jo tib bo, ana eljini ntuku aruku, a ni atu aruku, a ni nkpingi aruku.

⁵ Bab Farisi, a at'tibi ba atahm bao kehm bahbe Jisos re, "Jen ji wahnge abat'toono eba kil jo toono eljini ni babnso ejahre tib-r no? Bo kpehme ru abo kehm lehke nsol!"

⁶ Jisos kehm faange bo re, “Wahn aneb alum abal abal ba! Aisaya lohko nyehn amahr bada nahne! Lohko li ana á nyono no re,
“ ‘Esowo re, Ane ebame kp-m kake go nnyo a nnyo,

ntim ebo n wobem.

⁷ Bo kp-m kake mbol mbol,
eji bo kp'tibi atahm nya ane baka baka jehke no,
nya ki li nya Esowo.’ ”

⁸ “Wahn ebyake atahm nya Esowo, fere kp'toono eljini ni ane baka baka tibi no.”

⁹ Jisos kehm kpe bung tong bo re, “Ebnob ka wahn, eji m ma ten atahm nya Esowo, fere kp'limi eljini ni babnso ejahne.

¹⁰ Moses bungu re, ‘Kak nso, a nne! Nne awohng awohng no l'fere su nde, a nnyehn, bo bahk-e wulu.’

¹¹ “N kpo tib re, ‘Nne l'bel ejum ji kehn á jol kake nde ebo, a nnyehn, á l'fere bung re, Ejum jia li re Korban (ji lohngo re, li ka Esowo),

¹² á nehm kpe kak nde ebo, a nnyehn.’

¹³ Jia lohngo re, wahn ebtan ellum ni Esowo, fere kp'tibi atahm nya babnso ejahne. Elkohn nsol ana nyia li gbalee, nyi n kpo tob lim fvfo.”

Nsol nyi kpo lim nne, á k'jo jol saang go ege eltim

(Mat 15:10-20)

¹⁴ Jisos kehm kpe lung ellong ane, kehm tongo bo re, “Wuungen atung, wahn ane kpee, wahn kahn!

¹⁵ Ejumjum limm, ji kpo yel nne go nnyo, kehm limi eltim ene sab. Ji kpo lohng nne go eltim, ji ji kpo lim eltim nne sab.

16 Wuungen atung! Nne no kpi atung, nong, á wuk!"

17 Jisos lohngo kan go ellong ane bao o rehng go etahk, abat'toono ebe kehm-e bahbe bade elgan nio ni á tubu no.

18 Á kehm bungu tong bo re, "Wahn ebgboolo ana ane bako goa? Wahn lenngema? Ji kpo yel nne go nnyo sang kpo lim nne sab.

19 Tibre kpehme yel go ege eltim. Kpo yel go ala, fere lohng go ngubjing." Jisos bungu jia re, nsol alehke anyehng anyehng nyi ane kpo li, n'nob re wahr li.*

20 Á kehm kpe soro asi elbungu re, "Ji kpo lohng nne go ege atahng, ji ji kpo wahng ka nne k'jol saang.

21 Tibre go atahng ma nne, a eltim ene, owo ab'bi kpo lohng, ana ebi ntir atahng, as'sa, ejv avohko, ewulane, anebkal akono,

22 etong alahme, nkahng abare, ab'bi, enehm, atahm agboko, amahr abaare ejum nne, afahnge akiimi lake ane, elgeere, a elgboolo.

23 Ab'bi nyaa kpo lohng eltim nne. Nya nya kpo lim eltim nne sab."

Nnenkal no taame no
(Mat 15:21-28)

24 Jisos kehm tahme go ejahbe ajehng ji li kohlo Taya, song yel ekp'kpa ajehng. Tibre á joom seb re, nne awohng awohng kahn re, á li o. Á maam tiki biiri.

* 7:19 7:19 Elt 10:14-15; Kol 2:16

25 Nnenkal awohng no mmon ewe no nkal bele ebi etohko go ege atahng kehm wuku bada Jisos. Á kehm ba kpir-e, soro gbo tvtv, jamm-e alahng.

26 Mmonankal noo jolo nfono ejahbe no jo bung Grik. Á kehm gboongo Jisos re, á lub kam ebi etohko jio, yehke mmon ewe go eltim.

27 Jisos kehm-e faange re, “Nong, me n tohko gbo mbang le abon.† Nobem re me n rod nsol alehke nyi abon, ka ebv.”

28 Nnenkal noo kehm taame re, “Ee nsoo, fvfo, n kp'kahne re, akahb elang nya abon l'fooro gbo ndi, ebv bi kpo fohko li.”‡

29 Jisos kehm bungu tong-e re, “Tib go ellum ni a faange no, a li ma song kehng, tibre mmon ewa, ebi etohko m-e lohng go ege eltim.”

30 Nnyehn kehm feere je, lohko song nyehn mmon ewe nong go edilnong sange sange. Ebi etohko jio m-e lohko lohng.

Ana Jisos limi nlakatung wuk

31 Jisos kehm sehng go Taya asongo, song rehng go Saidon, fere song rehng go Dekapolis,§ tete song rehng go eto ji Galili.

32 Ane kehm koko nlakatung nyi ki jo ma bung nob nob, ba a ne goji Jisos, fere gboongo Jisos re, á lub kun-e ebo.

33 Jisos kehm-e koko, lohng a ne go ellong ane bao, kehm-e lohko anyohkebo go atung, fere so atel wohngo go ebnyohkobo abehng, ko song behd-e go ebliki.

† 7:27 7:27 Mat 15:24; Elt 13:46 ‡ 7:28 7:28 Mat 11:12 § 7:31 7:31 Mak 5:20

³⁴ Jisos kehm kpiidi amahr enye go elbung, tub eromo, kehm bungu tong nne noo re, “Efata,” ji lohngo re, “Lennge!”

³⁵ Tvtv o atung nne noo soro lennge, ebliki soro tahm. Á kehme elbungu nob nob.

³⁶ Jisos kehm bungu tong bo re, bo k'tooro tong ane. Jol eji á rehke rehke bo o, ano wo fvfo bo tob tooro kpee.*

³⁷ Nne awohng awohng no wuku no, jo kpo-e esi area. Bo re, “Yeblim ejum ajehng ajehng ebnoob go nseenga nseenge, ye jio ji kpo lim alakatung, bo wuk, fere lim akamme, bo bung.”

8

Ana Jisos kpe le ellong ane bako (4,000)

(Mat 15:32-39)

¹ Gaam kang fvfo, ellong ane bako kehm kpe ba. Eji bo ki kpe bel ejum ellehke ajehng ajehng, Jisos kehm lungu abat'toono ebe tv elne, kehm bungu tong bo re,

² “Ndon ma-m fili sehng. Tibre ane baa ebkang nfung era a name. Ejumjum bo kpeem kpi ji ellehke.

³ Re me n tum bo ana, bo song kehng, egom jindiki bahke kehme awo gbo mbang mbang, tib ane bandiki lohng nlaabambang ba.”

⁴ Abat'toono ebe kehm-e faange re, “Elka emahng nia, gan wo nne bahke tingi nsol alehke, kehm leke elkohn ane ana baa kpee?”

⁵ Jisos kehm bahbe bo re, “Ebred ebik n kpi no?” Bo kehm-e faange re, “E kpi ebred ebsehma.”

* **7:36 7:36** Luk 19:40; Mat 12:34

⁶ Á kehm tongo ellong ane bao re, bo ji ndi. Á kehm rodo ebred ebsehma bio, kehm kake Esowo saam, kehm bakke ka abat'toono ebe re bo song bak. Abat'toono ebe lohko lim ano.

⁷ Bo bele abon nsahre abik abik o fvfo. Jisos kehm kake Esowo saam go nsol nyia, fere tong abat'toono ebe re bo tob song bak.

⁸ Nne awohng awohng l'li wohngo. Owo abat'toono ebe kehm taare erik ji sa no, ruru ejeere na ebsehma.

⁹ Bo jolo ejum ane atahltahl nkpel ewubu (4,000). Jisos kehm tongo ane bao re bo song kehng.

¹⁰ Á kehm yele go egbang, a abat'toono ebe. Bo kehm tahme go ejahbe ji bo jo lung re Dalmanuta.

*Ana Bab Farisi sebe re bo nyehn nkpokosi
(Mat 16:1-4)*

¹¹ Bab Farisi kehm ba kehme Jisos abahbe bahb go nfaabe re, bo nyehn nkpokosi nyi ejahbetul Esowo, eji bo l'gar-e.

¹² Jisos kehm tubu eromo, kehm bungu re, “Jen ji wahng ka ane ba li anv kp'sebe re bo nyehn nkpokosi?”* Ellingi anehng anehng nehm jol ka ane bao.”

¹³ Á kehm tahme bo sa, song yel go egbang, tahm egbuk eto jehko.

*Ayist nyao nya Farisis, a nya Herod
(Mat 16:5-12)*

¹⁴ Abat'toono ebe y'yini abred go elkoko ba a nya. Sa mmobred awohng wo wo go egbang.

* **8:12 8:12** 1 Kor 1:22

¹⁵ Jisos kehm kake bo erehke re, “Gberen el-nahne go ayist nyao nya Farisis, a nya Herod.”

¹⁶ Abat'toono ebe kehm kehme elbunu atemtem. Bo bumu re, Jisos buntu alu nyaa, tib eji bo ki bel abred.

¹⁷ Jisos k'kahn re, lenngem bo re á buntu bade eltibi ni ane bao. Owo á kehm bahbe bo re, “Jen ji n kp'buntu bade abred nya n ki kpi? N nehme nyehna? N nehme wuka? Anv, li-n ekpehlekehla?”

¹⁸ N kpi amahr, n nehme nyehna? N kpi atung, n nehme wuka? N nehme kpe buuma,

¹⁹ ana m bakke ebred eblon, ka ane atahltahl nkpel ewubbal atahl awuba (5,000)? Ejeere ebbik n ko ar'rohko kak tahm a nya?”

Bo kehm faange re, “Ewubu ejeere ebbal.”

²⁰ Jisos kehm bahbe bo re, “Nyanjehle, eji m bakke ebred na ebsehma, ka ane atahltahl nkpel ewubu (4,000), ejeere ebbik n ko ar'rohko kak tahm a nya?”

Bo faange re, “Ejeere ebsehma.”

²¹ Jisos kehm kpe bahb bo re, “Wahn ka tiki lennga?”

Ana Jisos lim nwakamahr; á nob go Betsaida

²² Jisos, a abat'toono ebe je go Betsaida. Ane bako kehm koko nwakamahr je goji Jisos, song gboong-e re, á lub koor-e.

²³ Jisos kehm jabbe nwakamahr nyio go ebo, lohng a ne tahm go esi mbang. Á so atel, kak nne noo go amahr, kehm-e kooro abo go

amahr, kehm-e bahbe re, “Anv, a bahke ma nyehn ejuma?”

²⁴ Nne noo kehm lennge amahr enye, kehm bungu re, “N kp'nyehne ane. Bo li na li, are nti nyi kp'jene yanng.”

²⁵ Jisos kehm-e kpe kooro abo go amahr. Ngare nyio nne noo kehm gohro lennge amahr enye, amahr enye kehm feere ana wuku wuku. Á kehm nyehne ejum ajehng ajehng saang.[†]

²⁶ Jisos kehm-e tumu re, á song kehng, fere tong-e re, á k'sehng mbang ejahbe jio ji bo kp'na lohngo abake.

Ellum ni Pita bungu bada Jisos

(Mat 16:13-20; Luk 9:18-21)

²⁷ Jisos kehm tahme, a abat'toono ebe song rehng go abon ajahbe ba bo jo lung re Sisaria Filipi. Eji bo kp'jene go mbang, á kehm bahbe bo re, “Tong-m wahn, ane kpo bung renan bada name? Me n li elkohn nne awo?”

²⁸ Bo kehm faange re, “Egom jindiki kpo bung re, Wo Jon ji nwohngalahb wo. Egom jindiki re, Wo Elaija wo. Egom jindiki re, Wo nnyehnamahr Esowo wo.”

²⁹ Jisos kehm bahbe bo re, “Wahn fvfo mee? Wahn kpo bung renan bada name? Me n li elkohn nne awo?”

Pita kehm-e faange re, “Wo Kraist wo!”

³⁰ Jisos kehm rehke bo re, bo k'tong nnene ejum ajehng ajehng bada ne.

Ana Jisos bungu bade erem ebe, a elkv ene

(Mat 16:21-28; Luk 9:22-27)

[†] 8:25 8:25 2 Kor 3:18

³¹ Jisos kehm kehme abat'toono ebe tib re, "Mmon no nne bahke nyehne erem gbalee. Anebkul nfam, a atubesi abalimajom, go at'tibi ba atahm bahk-e tene, fere wul-e. L'kang nfung era á nyahme, fere jol go elkpín."

³² Jisos jo bungu alum nyao gbul gbul gbuul.

Pita kehm-e koko, tahm a ne go nkpohko, kehm-e kehme elrehke.

³³ Jisos kehm keebe, seenge abat'toono ebe, kehm nyame Pita re, "Nnehm, fak-m go esamahr! Ntir enya nyi nne nyi, nyi Esowo sang."

³⁴ Jisos kehm lungu ellong ane tv elne, fere tob lung abat'toono ebe, kehm tongo bo re, "Nne awohng awohng no l'tong re, á kp-m toono, nong á ten elne tv-m, fere rod ekros eje, tahm toon-m.‡

³⁵ Nne no l'tong re, á bahke tahre elkpín ene go njini nyia, á bahke fere tane na elkpín ene. Nne awohng awohng no l'fere tane elkpín ene tib go egame esi, a esi ji alum Esowo, á bahke bele na etingitingi elkpín.§

³⁶ "Li re nne bahke bele afang nya njini nyia kpee, fere tane etohko eje, nsehng anyi á bahke lehke?

³⁷ Ejumjum limm, ji nne bahke kake, kehm fake etohko eje.

³⁸ Nne no l'daang-m tib go egame alum go eb'bi njini nyia nyi ma ten Esowo, Mmon no nne bahke tob daang-e, á l'ba go ellub ni nde, a abarebare enjel."

‡ 8:34 8:34 Mat 10:28; 2 Kor 11:24-26; 2 Tim 3:12 § 8:35 8:35 Jon 17:3; 6:63

9

*Ana Jisos yaange ngubjing
(Mat 17:1-13; Luk 9:28-36)*

¹ Jisos kehm soro asi elbungu re, “Etingitingi, n kp-n tongo re, Egom jindiki ji yim a, nehm tiki kpo, tete bo nyehn etul bi Esowo ma badde ba go njini nyia a nsahm a nsahm.”

² Kange kan nfung erakera, Jisos kehm yehke Pita, Jems, a Jon tahm a bo go ewong ji wahre wahre. Jisos kehm yaange ngubjing enye o.

³ Nsol nyi á kake no kehm bare kpaaang, fere jo y'ya. Nnene limm go njini nyia, no bahke ma baare elkohn ana nio.

⁴ Elaija abola Moses kehm lohngo ba bung a Jisos.

⁵ Pita kehm bungu tong Jisos re, “Nsoo, n'nob re wahr jol a. E bahke sehke nkpatahk na era, ebkpatahk behko b'ba, behko bi Elaija, behko bi Moses.”

⁶ Pita kahnem ana ji á bahke bungu, tibre bo jo ffahl.

⁷ Ekparesemsem kehm soro tahl ba bulu bo. Bo kehm wuku ellum go ekparesemsem re, “A wo li akor-m mmon ewame no kpo kor-m s'sehng. Wuken ye!”*

⁸ Abat'toono ebe kehm soro kehme eljange. Bo kpeem nyehn nnene, sehngem Jisos ntahngtahng wo bo nyehn-e no.

⁹ Eji bo jo badde abake go nnaahb ewong, Jisos kehm rehke bo re, “Kana tiki tong nnene ji n nyehne no, tete Mmon no nne nyahme go elkv.”

* 9:7 9:7 2 Pit 1:17

¹⁰ Bo lohko bum erehke jio ji á kake bo. Bo kehm kehme elbunu atemtem re, “Elnyahme ngubjing go elkv nia lohngo renan?”

¹¹ Bo kehm bahbe Jisos re, “Jen ji wahng ka at'tibi ba atahm kpo bung re, Elaija bahke tohko gbo mbang ba?”

¹² Á kehm faange bo re, “Elaija bahke tohko gbo mbang ba, ba tuungu nsol kpee bum. Nwer Esowo bungu renan bada Mmon no nne? Bungu re, Mmon no nne bahke nyehne erem, bo bahk-e tene.

¹³ N kp-n tongo re, Elaija eblohko ba. Bo lim-e ana ji koro bo, jang jang ana nwer Esowo bungu no.”†

Ana Jisos limi mmonse no bele ebi etohko, á nob.

(Mat 17:14-21; Luk 9:37-42)

¹⁴ Bo feere kan ana, bo kehm ba kpiri abat'toono baka gana, fere nyehn ellong ane tvv ma senngre bo kak. At'tibi ba atahm bandiki jo limi nfaabe a abat'toono Jisos.

¹⁵ Ane bao nyehne kan Jisos ana, kehm kpoko bo esi. Bo kehm soro be tvtv song wan-e, kak-e nnyo.

¹⁶ Jisos kehm bahbe bo re, “Jen ji wahngre n kp'l'lim nfaabe?”

¹⁷ Nne awohng go ellong ane bao kehm faange re, “Nsoo, n ko mmon ewame ba a ne. Tibre á kpi ebi etohko go ege atahng. Á nehme ma bung.

¹⁸ Edi ajehng ajehng ji ebi etohko jio l'si mehl-e mehl, kpo rod-e tub ndi, nfahl jo tub-e na tub

† 9:13 9:13 Mat 11:14

go nnyo. Á kpo kono amahn go esi, fere tahne na tahne. Me n gboongo abat'toono eba re, bo kam-e ebi etohko jio jehke. Bo maam lim."

¹⁹ Jisos kehm tongo abat'toono ebe re, "Jen ji wahnge ní kpi ek'taame go egahna ntim? M bahke kange renan a nahne? Ko mmon noo, ba a ne!"

²⁰ Bo ko-e kan a, ba a ne, ebi etohko jio nyehne kan Jisos a, á kehm limi mmon noo, á gbo ngboko, fere gbo ndi, kehm kehme elgbehde. Nfahl jo tub-e go nnyo.

²¹ Jisos kehm bahbe nde re, "Ebkang renan eji eyam bia bom-e no?"

Á kehm-e faange re, "Bomo ngare nyi á jolo mmonse ntiil, tete rehng anv.

²² Nkpel tvv ebi etohko jio kpo gare re á wul-e. Nkpel nyindiki tub-e kak agun. Nkpel nyindiki tub-e kak alahb. Nong, wahr fil-a ndon, wo kak-r ebo, tohk-a jahk!"

²³ Jisos kehm bungu re, "Wobbung re, 'Tohk-m jahk.' Nne no l'taame, ejumjum limm, ji bahk-e riidi."

²⁴ Nde kehm soro rabe tvtv re, "Me n taame, kak-m ebo go egame ek'taame."[‡]

²⁵ Eji Jisos nyehne re, ellong ane bao kp'kame ba rur, á kehm nyame ebi etohko jio, fere tong-e re, "Etohko ji kpo lim nne gbo ekamme, fere lak atung, ka kpe tiki yel mmon noa!"

²⁶ Tvtv o ebi etohko jio kehm biingi tiim, kehm soro yehke mmon noo, á gbo ngboko ekidi l'lab. Ebi etohko jio kehm soro lohng-e. Mmon noo kehm sake noongo, are nkve nyi. Owo ane bandiki kehm kehme elbungu re, "Yebkpo."

[‡] 9:24 9:24 Mat 7:7

²⁷ Jisos kehm jabbe mmon noo go ebo, tab-e yiimi, mmon noo lohko yiimi.

²⁸ Jisos yele kan eksp'kpa me, abat'toono ebe kehm bake, ba bahb-e eji bo jolo ebo ebo re, "Jen ji wahnge wahr ki ma kam mmon noo ebi etohko jio yehke?"

²⁹ Jisos kehm faange re, "Elkohn etohko ana jio, n' nehm ma tiki kam yehke, tohko tiki jol re, ero akake bi."

*Ana Jisos kpe bung bade elkv ene
(Mat 17:22-23; Luk 9:43-45)*

³⁰ Bo kehm tahme ejahbe jio asongo go Galili. Jisos joom seb re nne awohng awohng kahn edi ji á li no.

³¹ Tibre á jo tibi abat'toono ebe re, "Mmon no nne, bo bahk-e rodo, kak abi ane go ebo, bo bahk-e wulu. L'kang nfung era, á nyahme, jol go elkpín."

³² Bo kahnem ji á jo b'bung. Bo jo ffahl a ye bahb.

*Elkohn nne awo li ntubesi?
(Mat 18:1-5; Luk 9:46-48)*

³³ Eji bo song rehng go Kapenium, bo kehm yele go eksp'kpa. Jisos kehm bahbe abat'toono ebe re, "Jen ji wahnge n' jo lim nfaabe mbang mbang?"

³⁴ Jol bo we faangem. Tibre bo jo limi nfaabe mbang mbang bada nne no li nj'joka nne go bo ellong.

³⁵ Jisos kehm jehke, kehm lungu abat'toono ebe, ewubu ane abal tv elne, kehm bungu tong bo re, "Nne no l'tong re, ye wo li ntubesi, á bahke fere

jol nkahlanjahm, fere jol nlokeltum no bahke jo loko ane kpee.”§

³⁶ Á kehm koko mmonse ba yiimi go bo a mbuksong, kehm-e kpaake ebo, kehm bungu tong bo re,

³⁷ “Nne no l'ko mmonse ana noa a go egama mbing, á ma-m tob ko. Nne no l'ko-m, á tob ko Nsoo no tum-m no.”*

*Nne no ki li nnekv ewahre, ye nne ewahre wo
(Luk 9:49-50)*

³⁸ Jon kehm bungu tong Jisos re, “Wahr ebnyehn nne no kpo kam ane abi atohko yehke go ega a mbing. Go egahre ellong á wobem. E sahd-e sahdre re á rahke, tibre á wobem go egahre ellong.”

³⁹ Jisos kehm faange re, “Kana ye sahdre re á rahke. Tibre nnene limm, no bahke limi nkpokosi go egama mbing, kehm fere jo bung ab'bi bada name.

⁴⁰ Etingitingi, nne no tohk-r ko ekv, ye nne ewahre wo.

⁴¹ Nne no l'ka-n mmobtuku alahb tib eji á li abat'toono ba Kraist, á bahke bele eltuuru go etingitingi.”†

*Nsol nyi kpo wahng nne yel abiafem
(Mat 18:6-9; Luk 17:1-2)*

⁴² Jisos kehm bungu re, “Ga nob re, bo kahn nne eltal go emel, tub-e kak alahb, sehngre re á lim mmonse no ma taame tv-m, á gbo yel abiafem.

§ 9:35 9:35 1 Kor 4:9-14; 1 Pit 5:3 * 9:37 9:37 Mat 25:40 † 9:41 9:41 Mat 10:40-42

⁴³ “Ebo eba l'kehm-a limi re wo yel abiafem, kim ebo bio tub go. Ga nob re wo bel ebo abehng, kpo, yel ejahbetul Esowo, sehngre re wo bel abo abal abal, kpo, je ellulagun ni l'k'tiki lahme go njinanjini.

⁴⁴ Go wo aroongo nya kpo li abi ane l'k'tiki kpo. Agun nehm tiki lahme.

⁴⁵ “Ekpade eja l'kehm-a limi re wo yel abiafem, kim ekpade jio tub go. Ga nob re wo jen ekpade ajehng, kpo, yel ejahbetul Esowo, sehngre re wo jen akpade abal abal, kpo, je go ellulagun.

⁴⁶ Go wo aroongo nya kpo li abi ane l'k'tiki kpo. Agun nehm tiki lahme.

⁴⁷ “Elmahr ena l'kehm-a limi re wo yel abiafem, luudu elmahr nio tub go.‡ Ga nob re wo bel elmahr anehng, kpo, yel ejahbetul Esowo, sehngre re wo bel amahr abal abal, kpo, je go ellulagun.

⁴⁸ Go wo aroongo nya kpo li abi ane l'k'tiki kpo. Agun nehm tiki lahme.

⁴⁹ “Nne awohng awohng, Esowo bahk-e doobo go agun.§

⁵⁰ “Akang kp'nobo. Elyebe akang l'lohng, a bahke limi renan, kehm kpe yebe?⁎ Belen akang go egahne atahng.† Jolen go elkoono atemtem!”

10

Ana Jisos bungu bade elbal amale

(Mat 19:1-12; Luk 16:18)

¹ Jisos kehm tahme edi jio, siiri aya ma bo kpo lung re Jodan, rehng go egbuk jehko ji Judea.

‡ 9:47 9:47 Kol 3:5-9 § 9:49 9:49 Mat 3:11; 1 Pit 4:12 * 9:50
9:50 Mat 5:13 † 9:50 9:50 Kol 4:6

Fvfo, ellong ane kehm kpe ba rur. Á kehm kpe tib bo ana á kpo kono eltibi.

² Egom Farisi jindiki kehm bake re bo ba gar-e. Owo bo kehm-e bahbe re, “Tong-r, ntahm enyahre b'bung re, nne li ma ten nkal ewe no jehk-e go etahka?”

³ Jisos kehm faange a mbahbe re, “Atahm anya Moses tib-n no?”

⁴ Bo faange re, “Moses tib-r re, nne yeele nwer, ka nkal ewe, kehm-e yehke elbal.”

⁵ Jisos kehm bungu tong bo re, “Moses nyono nsol nyia tib go egahne etahnsi.

⁶ Go mbomannahb eji Esowo limi njini, ‘Á limi nnenlum, a nnenkal.

⁷ Jia ji bahke wahng ka nne bahke tahme nde, a nnyehn sa, bo song jol abola nkal ewe,

⁸ bo fere jol ana ngubjing anyehng.’ Bo nehm kpe jol ane abal. Bo bahke fere jol ana nne awohng.

⁹ Ji Esowo ma kono edi ajehng, nne k'yaame.”

¹⁰ Bo feere kan a song rehng go bo etahk, abat'toono ebe kehm bahbe Jisos re, “Ellum ni a kp'na bungu lohngo renan?”

¹¹ Á kehm bungu tong bo re, “Nne awohng awohng no l'ten nkal ewe, fere song baange nondiki, yeblim abiafem nyao nya erehbe go esamahr bi Esowo tob nkal no á gbo mbang baang-e.

¹² Ano wo fvfo tob li ka nnenkal no l'be nlum ewe sa, fere song bal nlum nondiki. Yebtob lim abiafem nya erehbe go esamahr bi Esowo.”

*Ana Jisos fuulu abon ba nse
(Mat 19:13-15; Luk 18:15-17)*

¹³ Ane bako ko abon ba nse, ba goji Jisos re á kooro bo abo. Abat'toono ebe jo sebe re bo sahde ane bao.

¹⁴ Jisos wuku kan a me, atahng kehm-e rake. Á kehm tongo abat'toono ebe re, “Yaken abons'sohko abonse ba ga egame! Kana kpe sahde bo! Tibre elkohn ane ana abonse baa, bo ba etul bi Esowo li ka bo.

¹⁵ Etingitingi, n kp-n tongo re, Nne awohng awohng no tohko taame, woomo go elwo ni Esowo ana mmonse kpo woomo go elwo ni nde, etul bi Esowo á nehm li.”*

¹⁶ Á kehm koko abonse bao, kpaake bo abo, kehm kunu bo abo, jo fuulu bo.

*Efange nne
(Mat 19:16-30; Luk 18:18-30)*

¹⁷ Eji Jisos ma tahm eljen ene, á kehm nyehne nne ma be, ba jamm-e alahng, kehm-e bahbe re, “Nnooba nt'tibi, m bahke limi renan, kehm bele elkpin ni li go njinanjini?”

¹⁸ Jisos kehm-e bahbe re, “Jen ji wahng ka, a kehm-m lungu re nnooba nt'tibi? Nnene limm, no li nnooba nne, sehngem Esowo ntahngtahng bi li nnooba nne.

¹⁹ A kp'kahne atahm nya bungu re, ‘Ka wul nne! Ka kak afem nya erehbe! Ka v ejv! Ka yiimi ntianse efahnge! Ka nehm nne! Kak nso, a nne!’”

* **10:15 10:15** Mat 18:3

²⁰ Nne noo kehm bungu re, “Nt'tibi, jol bomo ngare nyi n jolo ntiil tete ba rehng anv, nyaa kpee n kpo b'bum.”

²¹ Go elkoro wo Jisos kpiidi amahr enye seeng-e, kehm-e tongo re, “Ejum ajehng ji ma-a sa. Song, wo song gungu nsol afang enya, ko ba ka akpak! Owo a bahke bele afang go ejahbetul Esowo, wo ba, ba toon-m.”†

²² Nne noa wuku kan ano, esamahr kehm-e gbodo. Á kehm soro tahm eje ndon ndon. Tibre á fange sehng.

²³ Jisos kehm keebe, tong abat'toono ebe re, “Bahke riidi, afang ane kehm yele go ejahbetul Esowo.”

²⁴ Abat'toono ebe, alum nyao gbale bo go eltim sehng. Jisos kehm kpe bung tong bo re, “Ate ebame, bahke riidi area, nne kehm yele ejahbetul Esowo.

²⁵ Re efange nne kehm yele go ejahbetul Esowo, ekamel bahke sehng go mbang a nga.”‡

²⁶ Kpo na kpo abat'toono ebe esi tete ga. Bo kehm-e bahbe re, “Wo, nne awo bahke bele eltahre me l'lun?”

²⁷ Jisos kehm keebe, seenge bo, kehm bungu re, “Ji nne l'k'ma lim, goji Esowo riidem. Ajehng ajehng limm, ji kpo riidi Esowo.”

²⁸ Pita kehm bungu re, “Wahr jia, eji e li a, wahr ebyake ejum ajehng ajehng kpi wo toono.”

²⁹ Jisos kehm faange bo re, “Etingitingi, n kp-n tongo re, Nne awohng awohng no l'yake etahk eje, fere yake abonanyehn, nnyehn, nde, abon ebe, egbe eje, tib go egame esi, a esi ji alum Esowo,

† 10:21 10:21 Mat 10:38 ‡ 10:25 10:25 Rom 8:3; Hib 11:6

³⁰ á bahke bele na budu. Á bahke bele na ntahk budu nkpel atahl alon, bel abonanyehn, bab nnyehn, abon, a ebgbe. Fvfo, ebnohko bia. Go ngare es'song, á bahke bele elkpin ni li go njinanjini.

³¹ Ane gbalee ba li agbokombang bahke fere jol akahlenjahm. Fvfo, ane gbalee ba li akahlenjahm bahke fere jol agbokombang.”

*Ana Jisos gohro bung bade elkv ene
(Mat 20:17-19; Luk 18:31-34)*

³² Eji bo jo tahm go Jeusalem, Jisos gbo abat'toono ebe mbang. Ala jo teelee bo sehng. Ane bako ba jo toono bo go njahm jo f'fahl.

Jisos kehm kpe yehke abat'toono ebe, kehm kpe tong bo nsol nyi bahk-e limi.

³³ Á bungu re, “Nyehnen, anv, e kp'tahme go Jeusalem. Owo Mmon no nne, bo bahk-e rodo, kak atubesi abalimajom, a at'tibi ba atahm go abo. Bo bahke kimi elam ji bo bahk-e wulu, fere rod-e, kak ane bako ba ki li Jus go abo.

³⁴ Bo bahk-e nyoko, fere jo so atel wohng-e, dv-e tete bo wul-e. L'kang nfung era, á nyahme go elkv, fere jol go elkpin.”

*Mbahbe nyi Jems abola Jon bahbe no
(Mat 20:20-28)*

³⁵ Abon Sibidi, Jems abola Jon kehm bake goji Jisos, ba tong-e re, “Nt'tibi, ejum jia, ji e kp'sebe re, wo lim ka-r.”

³⁶ Jisos kehm bahbe bo re, “Jen ji n kp'sebe re me n lim ka-n?”

³⁷ Bo kehm-e faange re, “Ngare nyi a ma ji go ega eti etul, e kp'sebe re wahr tob ji a na o, noko go ega ejang eboblum, noko go ega ejang ebobkal.”

³⁸ Jisos kehm tongo bo re, “Ń nehme kahn ji n kp'b'bahb. M bahke ma nyehn erem bi me m bahke nyehna? M bahke ma bel ewohngalahb ji m bahke bela?”

³⁹ Bo kehm faange re, “Ee, e bahke ma bel.”

Jisos kehm bungu tong bo re, “Etingitingi, m bahke tob nyehn erem bi m bahke nyehne, fere bel ewohngalahb ji m bahke bele. §

⁴⁰ Nsahm me n kpimm, nyi m bahke yehke ane re, noko ji go egame ejang eboblum, noko ji egame ejang ebobkal. Esowo bi bi bahke kake ane bao adi nya á ma toobo re á ka bo.”

⁴¹ Erik abat'toono baka gana, ane awubu, wuku kan a bade Jems, a Jon, eltim kehm kehme bo rak tob bo.

⁴² Jisos kehm lungu bo kpee, kehm tongo bo re, “Ń kp'kahne re, ane ba bo yehke bo re bo jol atul, bo kpi nsahm nyi bo kpo fili ane ebo t'tahne. Aj'jok ane, bo ba kpo fili bo t'tahne.

⁴³ Wahn, kana jo lim ano! Nne awohng awohng ewahne no l'seb re á jol nj'joka nne, á bahke fere jol nlokeltum ka wahn ane kpee.

⁴⁴ Nne awohng awohng ewahne no l'fere seb re á jol ntubesi, á bahke fere jol nju ka wahn ane kpee.

⁴⁵ Tibre Mmon no nne baam re bo jo lok-e, á ba re á ba loko na, fere ka elkpin ene, tahre ane gbalee yake.”*

*Ana Jisos limi Batimos, á nyehn
(Mat 20:29-34; Luk 18:35-43)*

⁴⁶ Bo kehm bake go Jeriko. Eji Jisos lohngo no, a abat'toono ebe, a ellong ane ba jo toon-e, nwakamahr a nne no bo jo lung-e re Batimos ji mmon a Timeus ji nkpe a mbang ona, jo gboongo ane nsol.

⁴⁷ Á wuku kan a re Jisos ji Nasaret wo, á kehm kehme elrabe re, “Jisos ji mmon a Devid, me n lub fil-a ndon!”

⁴⁸ Ane gbalee kehm-e kehme elnyame re, á rahke ewok.

Jol á jo kpe rabe na wahre wahre re, “Mmon a Devid, me n lub fil-a ndon!”

⁴⁹ Jisos kehm yiimi, kehm bungu re, “Lungen ye tv-m!”

Bo kehm lungu nwakamahr nyio re á ba. Bo kehm-e tongo re, “Bob eltim, wo tahm ba, á kp-a lungu.”

⁵⁰ Á kehm tahnge mbomo eme tub, mehl karab yiimi, kehm jeke goji Jisos.

⁵¹ Jisos kehm-e bahbe re, “A kp'sebe re me n lim jen ka-a?” Nwakamahr nyio kehm bungu re, “Nt'tibi, n kp'sebe re me n lub nyehn!”

⁵² Jisos kehm-e tongo re, “Song, eltaame ena ni ma wahng ka, a ma nyehn.”

Tvtv o á kehm soro nyehn, tahm toono Jisos mbang mbang asongo.

* **10:45 10:45** Luk 22:25-27

11

*Ana Jisos yele go Jeusalem, a egburu ellub
(Mat 21:1-11; Luk 19:28-40; Jon 12:12-19)*

¹ Eji bo ma jen kabbe go Jeusalem, a abon ajahbe ba li sennge o kak, ana Betfage abola Betani ba li kohlo ewong ji bo kpo lung re Oliv, Jisos kehm yehke abat'toono ebe na abal, tum re bo song.

² Á tongo bo re, "Songen ejahbe jio o ji li egahna mbuksong. N' l'si r'rehng o, m' bahke nyehne mmombvankang no bo kal-e k'kuumu. Fanngen ye, wahn ko-e ba!

³ Nne awohng awohng l'fere bahb-n re, 'N' kpi jen lim a ne?' tongen ye re, 'Ntul wo kp-e sebe.' Nfona mbvankang bahk-e yake elwaare ka-n."

⁴ Bo kehm jeke, lohko song nyehn mmombvankang nonehm o, bo m-e kahn kohlo go mbutahk. Eji bo jo fanngge,

⁵ ane ba yiimi o kehm bahbe bo re, "Jen ji n' kp'limi o? Jen ji wahngge n' kp'fanngge mmombvankang noo?"

⁶ Bo kehm faange bo ana Jisos tongo bo. Bo yake bo, bo tahm a ne.

⁷ Bo kehm koko mmombvankang noo ba a ne goji Jisos. Bo kehm rodo abomo ebo, yal mmombvankang noo go njahm. Jisos kehm kuumu.

⁸ Ane gbalee jo yale abomo ebo go mbang. Egom jindiki jo ja amang go emahng, jo ba yal go mbang.

⁹ Ane bandiki gbo-e mbang, bandiki kahle njahm. Bo kpree kehm kehme elrabe re, "Tehken Esowo!"

“Elfuulu jol ka nne no ma ba go mbing nyi Ntul!”

¹⁰ “Elfuulu jol ka etul bi Devid nso ejahre bi kp'bake!”

“Ellub jol ka Esowo bi li go ero!”

¹¹ Jisos kehm rehng go Jeusalem, sehng song yange go etahk Esowo, kehm kehme elkpuru ejum ajehng ajehng ji jolo go etahk Esowo jio. Eji atv yahke behde, Jisos kehm tahme asongo go Betani, a abat'toono ebe, ewubu ane abal.

Ana Jisos nyehne amahr bade efig

(Mat 21:18-19)

¹² Etoono efung behko eji bo tahme go Betani, jo jen asongo, Jisos, njal kehm-e yame.

¹³ Á kehm nyehne eti ji bo kpo lung re efig go fee ma tahb na tahb, jolo anyane anyane. Á kehm jeere, song rehng go nnaht re, fundiki á bahke tingi nkab anyehng. Eji á jeere no kohlo re á kpur me, jol kabem. Tibre ngare ka rehng nyi kpo kab.

¹⁴ Jisos kehm tongo eti jio re, “Nnene limm, no bahke kpe li nkab anyehng anyehng enya go etingitingi.”* Abat'toono ebe t'tob wuk.

Ana Jisos je go etahk Esowo

(Mat 21:12-17; Luk 19:45-48; Jon 2:13-22)

¹⁵ Eji bo rehng go Jeusalem, Jisos kehm yange go etahk Esowo, kehm song kam ane bao ba jo gungu, fere g'gunu. Á kehm gbulu akp'kuru nya ane ba jo yaange akpohko tub, fere gbul nti nyi ane ba jo gungu mbehl tub.

* **11:14 11:14** Mat 25:29

¹⁶ Á kpeem tiki taame re, nne awohng awohng jo sol ejum ajehng ajehng, sehng a ji etahk Esowo jio.

¹⁷ Á kehm tibi ane bao re, “Bo nyono go nwer Esowo re, Esowo re, ‘Etahk ejame, bo bahke jo lung re etahk ero akake ji li ka ane kpee.’ Wahn ebfere rod, bum ana ebehre awajv.”

¹⁸ Atubesi abalimajom, a at'tibi ba atahm wuku kan jia, bo kehm kehme mbang seb nyi bo bahke Jisos wul. Bo jo fahl-e fahl, tibre ellong ane bao kpo bo esi area tib go ege eltibi.

¹⁹ Elgung ba kan a, Jisos, a abat'toono ebe kehm tahme ejahbe jio asongo.

Ejum akpili bade eti jio

(Mat 21:20-22)

²⁰ Etoono efung behko eji bo jo jen mbang mbang asongo, bo kehm nyehne eti jio ji ki kab akab ma kpo kpee tete rehng go alohk.

²¹ Pita kehm buumu ji ma lim, kehm bungu tong Jisos re, “Nt'tibi, nyehn! Eti ji nyaane a bungu no re bahke kpoko, eblohko kpo.”

²² Jisos kehm faange bo re, “Taamen tv Esowo!

²³ Etingitingi, n kp-n tongo re, Nne l'taame tv Esowo, á li ma tong re, ‘Ewong mehl, song yiimi go aya!’ Ewong jio lohko mehl. Á tohko bel nfaabe go ege eltim, á l'fere taame re, ji á bahbe no bahke lohko lim, ji ji Esowo bahke tiki lim ka-e.[†]

²⁴ Owo wahng ka n kp-n tongo re, N l'kak ero, bahb ejum ajehng ajehng, taamen re wahn eblohko bel, ji ji m bahke bele.[‡]

[†] 11:23 11:23 Mat 17:20 [‡] 11:24 11:24 Jon 14:13

25 “N l'kehme ero kak, jo tahmen ka ate ebahne go ejum ajehng ajehng ji n kpi no bada bo, goji Nso ejahne no li go ero l'tob tahm ka-n go egahne abiafem.§

26 N tohko jo tahm ka nne, Nso ejahne no li go ero nehm tob tahm ka-n go egahne abiafem.”

*Mbahbe nyi li bada nsahm nyi Jisos
(Mat 21:23-27; Luk 20:1-8)*

27 Bo kehm kpe feere go Jeusalem. Eji Jisos jolo go etahk Esowo, atubesi abalimajom, at'tibi ba atahm, a anebkul nfam kehm bake goji Jisos,

28 kehm ba bahb-e re, “Nsahm anyi a kpi no, nyi a kpo lim elkohn nsol ana nyia?”

29 Jisos kehm faange bo re, “Me fvfo, m bahk-n tob bahb mbahbe anyehng. N l'faang-m, m bahk-n tongo nsahm ana nyi n kpi no, nyi n kpo lim nsol nyia.

30 Tong-m wahn, ewohngalahb ji Jon lohng goji Esowoa, afi lohng goji ane?”

31 Bo kehm kehme nfaabe lim atemtem re, “E bahke bungu renan? E l'tong re ‘Ewohngalahb ji Jon lohng goji Esowo’, á bahk-r bahbe re, ‘Jen ji wahng ka n ki taame tv alum nya Jon?’* ”

32 E l'fere bung re, ‘Lohng goji nne’, ma ane bahk-r limi ejum nji?” Bo jo fahle ane, tibre nne awohng awohng jo sahb k'kahn re, Jon jolo etingitingi nnyehnamahr Esowo.

33 Owo wahnge bo kehm faange Jisos re, “E nehme kahn.”

§ 11:25 11:25 Mat 5:23-24 * 11:31 11:31 Mat 3:7-12

Jisos kehm bungu tong bo re, “L'lun, wahn n nehm tob tong nsahm nyi wahng ka n kpo lim nsol nyia.”

12

*Elgan ni li bade abayaame etahngga
(Mat 21:33-46; Luk 20:9-19)*

¹ Jisos kehm kehme elbungu a bo go ngaane re, “Nne jolo go, no bahme avain, fere kak ega senngge. Á kehm rahme elbing ni bo jo kak akab nti, fere jo kaame akab nti nyao tv elbing nio, alahb jo lohng. Á si enyong, kak ane ba jo baabe edi jio, kehm yaame abahmgbe edi jio, toono eje tahm ejahbe jehko ji li fee.

² Ngare rehngge kan a, nyi bo kpo bong akab nti nyao. Nfono etahngga kehm tumu nlokeltum ewe awohng tv re á song ko akab nti enye goji ane ba á yaame bo etahngga eje.

³ Bo kehm-e tubu ejahm, dv-e t'tahne, kam-e, á feere abo abo.

⁴ Á kehm kpe tum nlokeltum noko. Bo kehm-e kpe dv, bom-e elok go esi, fere son-e.

⁵ Á kehm kpe tum nne noko. Ye, bo wul-e na. Ano wo tob lim egom jindiki ji á kpe tum. Bandiki bo dv bo. Bandiki bo wul na.

⁶ “Awohng no gohr-e sa, ekorokoro mmon ewe wo. Es'kohro, á kehm-e gohro tum tv bo. Á tiri re, ‘Mmon ewame bahke lubu bo.’

⁷ “Abayaame etahngga bao kehm kehme elbungu atemtem re, ‘A wo li nne no bahke lehke elkv ene. Baan, wahr wulen ye, eji etahngga jia l'fere jol j'jahre.’

⁸ Bo kehm-e jabbe, wul-e, fere rod-e tub go nkpe etahngga.*

⁹ “Jen ji nfono etahngga noo bahke limi? Á bahke wulu abayaame etahngga bao, fere faake etahngga jio ka ane bandiki.

¹⁰ Wahn ka lung a lung edi nwer Esowo jiaa, ji bungu re,

“ ‘Eltal ni asehketahk tene no, ni ni ma fere jol nnaahb ekahma?

¹¹ Jehova limi jia ji li nkpokosi go egahra ntim.’ ”

¹² Atubesi Jus kehm jo seb re bo bob Jisos. Bo jo kahne re, elgan nio á tubu bada bo. Bo jo f'fahl ellong ane ba jolo o. Bo kehm-e tahme sa, tahm ebo.

*Mbahbe nyi li bade etak atahbe
(Mat 22:15-22; Luk 20:20-26)*

¹³ Bo kehm tumu egom Farisi jindiki, fere tob tum egom ane ba Herod tv Jisos re bo song bob-e go ege alum nnyo.

¹⁴ Eji bo je no, bo kehm bungu tong-e re, “Nt'tibi, e kp'kahne re, wo etingi nne ji. E kp'kahne re, wo kpehme rang ane. Nne awohng awohng li jang jang go ega esamahr. Á kpo lohko tib mbang nyi Esowo go etingitingi. N'nob re wahr jo tahb etak ka ntul a Roma, afi nobem? Wahr jo tahba, afi wahr k'jo tahb?”

¹⁵ Jisos k'kahn awak ebo, kehm fere tong bo re, “Jen ji wahnge n kp-m gare? Ka-m wahn nsiring, me n tohko nyehn!”

* 12:8 12:8 Hib 13:12

¹⁶ Bo kehm koko nsiring ba ka-e. Á kehm bahbe bo re, “Esi jia ji nyehne ji? Mbing nyia nyi nyehne nyi?”

Bo kehm-e tongo re, “Esi jia ji ntul ji. Mbing nyia nyi ntul nyi.”

¹⁷ Jisos kehm bungu re, “Ka-n ntul ji li ka ntul, wahn ka Esowo ji li ka Esowo!”[†] Jisos, kehm kpoko bo esi.

*Mbahbe nyi li bade elnyahme ngubjing go elkv
(Mat 22:23-33; Luk 20:27-40)*

¹⁸ Egom Sadusi jindiki kehm bake goji Jisos.[‡] Bo jo kono eltibi re, “Elnyahme ngubjing go elkv limm.”[§] Bo kehm bungu re,

¹⁹ “Nt'tibi, ntahm nyi Moses nyono ka-r li re, ‘Nne l'kpo, nkal ewe sa, eji á ki jel mmon awohng awohng, mmonannyehn nne no ma kpo wo bahke baange nnenkal noo, eji á l'jel abon ka mmonannyehn no ma kpo.’

²⁰ Jolo abonanyehn nne na asehma. Ngbokam-bang baange nkal. Mmon awohng awohng á jelem, kehm kpoko.

²¹ Etoono kpe baange nnenkal nonehm o. Mmon awohng awohng á jelem, á tob kpo. Ano wo tob jol a mmonannyehn noko no toon-e no.

²² Erik abonanyehn bako ba sa njahm tob baange nnenkal nonehm o. Mmon awohng awohng bo tikem jel. Bo kpo kpee. Es'kohro, nnenkal noo gohro kpo.

²³ Go es'kohro efung, ane l'fere nyahme go elkv, nne awo bahke jolo nlum a nnenkal noo? Kpee

[†] 12:17 12:17 Rom 13:1-7 [‡] 12:18 12:18 Elt 5:17 [§] 12:18 12:18
Elt 23:6-9

abonanyehn bao na asehma ko nnenkal noo ana nkal abo.”

²⁴ Jisos kehm bungu tong bo re, “Wahn ebsoodo. N’ kp’kahne ji wahng kaa? Tibre n’ nehme kahn nwer Esowo, n’ nehme kahn nsahm nyi Esowo.

²⁵ Go efung elnyahme ngubjing go elkv, ane bahke fere jol ana babenjel go ejahbetul Esowo. Aneblum nehm kpe ko akal. Anebkal nehm kpe bal alum.

²⁶ Bade elnyahme ngubjing go elkv, n’ ka lung a lung go nwer nyi Moses bade eti ji jo lula? Owo bo nyono re, ‘Esowo bungu tong Moses re, Me wo li Esowo bi Ebrahim, a bi Aisik, a bi Jakob.’

²⁷ Jia lohngo re, Ye wo li Esowo bi ane ba li go elkpín, bi akvne sang. Wahn ebsoodo tete.”

*Ngbokambang a ntahm nyi ga gbal
(Mat 22:34-40; Luk 10:25-28)*

²⁸ Nt’tibi no atahm awohng jolo o, no jo wuk ana bo jo bung. Á nyehne re, Jisos ebfaange Bab Sadusi nnooba nfaange. Á kehm lohngo ba, ba bahb Jisos re, “Ntahm anyi li li ngbokambang a ntahm nyi gbale sehng e atahm kpee?”

²⁹ Jisos kehm faange re, “A wo li ngbokambang a ntahm, ‘Wuken abon Israel! Esowo Ntul ewahre, ye wo li Esowo ntahngtahng.

³⁰ Nobo re Esowo Ntul ewa jo kor-a eltim eltim ena, a etohko etohko eja, a ntir ntir enya, a eko eko eja.’

³¹ Etoono ntahm nyehka li re, ‘Nne ebjing ewa jo kor-a ana ebjing eba.’ Ntahm anyehng anyehng

go kpeem li, nyi li etahntahn ntahm sehngre nyia na ebal.”*

³² Nt'tibi no atahm noo kehm bungu tong Jisos re, “Nt'tibi, woblohko bung go etingitingi. Etin-gitingi, lohko li Esowo na abehng. Esowo abehng abehng kpeem li, sehngem ye ntahngtahng wo li no.

³³ Ano wo nobo re Esowo jo kor nne eltim eltim ene, a ntir ntir enye, a eko eko eje. Nne ebjing ewe jo kor-e ana ebjing ebe.† Elbumu ni nne bahke jo bum ntahm nyia na ebal, ni ni ga nob sehngre enyam kpee bi á kpo ko, jahm fi ka Esowo, a nsol nyehko nyi á kpo ko lim njom ka Esowo.”

³⁴ Eji Jisos kahne re, yebfaange nnooba nfaange, á kehm-e tongo re, “Ebsa ntiil, a li etul bi Esowo.”‡ Nnene kpeem sahb, bahb Jisos mbahbe anyehng anyehng.

*Mbahbe nyi li bade Mesaya
(Mat 22:41-46; Luk 20:41-44)*

³⁵ Eji Jisos jo tib go etahk Esowo, á kehm bahbe mbahbe anyehng re, “Jen ji wahngre at'tibi ba atahm kpo bung re, Mesaya bahke lohngo go et'tohngo ji Devid?

³⁶ Yefono Devid nyono ana Etingi Etohko tong-e no re,

“ ‘Esowo bungu tong ntul ewame re,
Ji go egame eboblum,
tete me n lim anebekv eba etikunakpade eja.’

³⁷ Yefono Devid jo lung-e re,
‘Ntul ewame’.

* **12:31 12:31** Jon 13:34 † **12:33 12:33** Mat 7:12 ‡ **12:34 12:34**
Elt 26:28

Bahke jolo renan, ntul noo kehm fere jol mmon ewe?"§

Ellong ane bao wuku alum nyao go eyebatahng.

*Ana Jisos kake erehke bade at'tibi ba atahm
(Mat 23:1-36; Luk 20:45-47)*

³⁸ Jisos kehm kpe tib ane re, "Gberen at'tibi ba atahm! Kpo kor bo re bo jo kak akpawobo, jo yanne. Go are, bo kpo seb re, ane jo gong, kak bo nnyo.

³⁹ Go ero, bo kpo ji go mbuksong. Go elkak, bo kpo ji adi nji nya fuumu re aj'jok ane ji.

⁴⁰ Bo kpo nehm akalebun, taare ntahk ebo. Bo kpo kak alaabe aro go nnyo a nnyo, go ntim kpehme rehng. Elam ji bo bahke bibi sehng."*

*Ayare nya nkalebun ka no
(Luk 21:1-4)*

⁴¹ Eji Jisos ji ona eksp'kpa Esowo kohlo edi ji bo kpo ka ayare, á jo nyehne ana bo kpi ayare ka. Afang ane tvv jo ba yaange na yaange akpohko ka.

⁴² Nkpak a nkalebun kehm bake, ba tub ederi ebbal kak, bi limi mpene anyehng.†

⁴³ Jisos kehm lungu abat'toono ebe tv elne, kehm tongo bo re, "Etingitingi, n kp-n tongo re, Nkalebun noa ana, ye wo ga ka sehng ane bao kpee.

⁴⁴ Egom jehko jo ka gbalee, jo sa bo gbalee go. Ye ji li nkpak, á ka kpee ji á bele no, ji kehn á jol ma ko, gunu nsol alehke."

§ 12:37 12:37 Elt 2:29-35 * 12:40 12:40 2 Pit 2:1-3; 2 Tim 3:1-9; Jud 3-19 † 12:42 12:42 2 Kor 8:12; 9:7

13

Ana Jisos bungu bade ana etahk Esowo jio bahke ranng

(Mat 24:1-2; Luk 21:5-6)

¹ Jisos lohngo kan a ekp'kpa Esowo me, nt'toono ewe na awohng kehme tongo re, "Nt'tibi, nyehn elkohn anoobo ntahk nya li gae! Nyehn agburu atal nya bo ko sie!"

² Jisos kehm faange re, "Wobnyehn aj'jok ntahk nyaa? Jol eltal anehng anehng limm, ni bahke kpe kuumu a ntem. Bo bahke wake kpee, wohng ndi."

Erem, a afemfem

(Mat 24:3-14; Luk 21:7-19)

³ Eji Jisos ji go ewong ji bo kpo lung re Oliv, etahk Esowo jolo go ege a mbuksong kpidi kpidi, Pita, Jems, Jon, a Andru, bo jo jolo a ne o kehm-e bahbe re,

⁴ "Tong-r ngare nyi afemfem nyaa bahke limi. Tib-r elliingi ni bahke jolo, nsol nyio kpee kehm limi."

⁵ Jisos kehm kehme eltibi bo re, "Kunen ekpu, eji nne awohng awohng l'ki-n nehm.

⁶ Ane tvv bahke bake go egama mbing re, bo ba li nt'tahre. Bo bahke nehme ane tvv.

⁷ "N l'wuk bade ebta bi li kpidi kpidi, fere wuk aka nta fee, kana jo fahl mbol mbol! Elkohn nsol nyia bahke tiki lim. Jol nyaa ana lohngem re, es'kohro efung bi ma rehng na.

⁸ Ajahbe nyandiki bahke jo nok atemtem. Ajahbe nyandiki bahke kehme elnoko a ajahbe nyako. Ndi bahke jo gb'gbahke adi nyandiki. Owo

njal bahke bake. Nyaa a kpee nya li mboman-nahb erem.

⁹ “Baaben elnahne! Ane bahk-n jo bob, kak esub. Bo bahke jo dv-n dv go ntahk ero. M̃ bahke jo yiimi go esamahr atubesi, a esamahr atul tib go egame esi, eji ñ l'jo yiimi ntianse nyi nnoobo etib tong bo.

¹⁰ “Alum enyame bahke tohko gbo mbang yeere rehng ejang njini abehng abehng.

¹¹ Bo l'bob-n, kak go esub, kana jo tiiri nsol nyi m̃ bahke bungu. Ngare nyio ellum anehng anehng ni Esowo l'fere ka-n, bungen! Tibre alum nya m̃ bahke bungu, nyanyahne sang, bahke jo lohng goji Etingi Etohko.

¹² “Ane bahke kehme abonanyehn jabbe ka re bo wul. Babnde nne bahke tob lim abon ebo ano. Abon bahke tob ten babnde ebo, fere jabbe bo ka re bo wul.*

¹³ Nne awohng awohng bahke jo ko-n ekv tib go egama mbing. Nne awohng awohng no l'soro asi ano go mbang nyi Esowo tete rehng go es'kohro, ye wo bahke bele eltahre.”

Ejum ji kp'sahb s'sab

(Mat 24:15-28; Luk 21:20-24)

¹⁴ “M̃ bahke nyehne ‘ejum ji kp'sahb s'sab’, ji bahke ranngedi, yim no edi ji ki fuumu re yiimi. Wuungen atung, wahn kahn nob nob ana lohngo no. Ngare nyio ane ba li go Judea bahke beke, tahm go awong.

* **13:12 13:12** Mat 10:17-22; 2 Tim 3:1-5

¹⁵ Nne no l'kuumu go ege ero etahk, jo re ekv, á l'badde, á k'tohko seb elyele go eksp'kpa song rod ejum fili.

¹⁶ Nne no l'jol go ege egbe, á k'kpe tohko be na tahm go etahk, song rod abomo enye.

¹⁷ Ngare nyio bahke sabe area ka anebkal ba li ela, a anebkal ba kpi abon go ebo.

¹⁸ “Kaken ero ka Esowo, eji nfem nyio l'k'lim ngara nnale.

¹⁹ Ngare nyio erem bahke gbale sehng, jol bi kala j'jol bomo eji Esowo limi njini tete rehng anv. Jol erem ana bio nehm kpe tiki jol ejolojolo.

²⁰ “Tohko jol re Jehova tele afung nyao kahbe, nne awohng awohng nehm jol no bahke bele eltahre. Tib go esi ane ba Esowo ma yehke, ji ji bahke wahnge Esowo tele afung nyao kahbe.

²¹ “Ngare nyio nne l'tong-n re, ‘Nyehnen Kraist ga!’ afi á tong-n re, ‘Nyehnen Kraist go!’ kana taame tv-e!

²² Akimfahnge ane bahke lohngo ba, jo ba bung re, bo ba li Mesaya. Egom jindiki bahke jo bung re, bo ba li abanyehnamahr Esowo. Bo bahke kehme nliingi tib, fere jo lim akpokosi, eji limi limi kan, bo l'nehm aneb Esowo, ba Esowo ma jak.†

²³ Kunen ekpu, m ma-n tong jia ana ngare kehm rehng.

*Elbake ni Mmon no nne
(Mat 24:29-31; Luk 21:25-28)*

²⁴ “Ngare nyio,
“ ‘Njul bahke dvvrv.

† 13:22 13:22 Ell 13:13; 2 Tes 2:9

Ebareka nehm kpe ya na eyakeyake.

²⁵ Alonlo bahke kehm elfooro go elbung gbo.

Atahm nya elbung bahke range.'

²⁶ "Owo bo bahke nyehne Mmon no nne kp'bake go akparesemsem, a egburu nsahm enye, a ellub.‡

²⁷ Owo á bahke tumu enjel enye re bo song ko ane ba Esowo ma jak bo go nkpohka njini anyehng anyehng ba a bo.§

Ejum akpili bade efig

(Mat 24:32-35; Luk 21:29-33)

²⁸ "Kpilen ejum go eti ji bo kpo lung re efig.* Ngare nyi eti jio ma nyono, kak anyane, owo ń bahke kahne re, nnale ebba.

²⁹ Tob li ka-n fvfo. ń l'nyehn nsol nyio kp'limi, kahnen re, elbake ni Mmon no nne ebkabbe.

³⁰ Etingitingi, n kp-n tongo re, Ane bao ba bahke jolo go elkpin ngare nyio, bo nehm kpo tete nsol nyio lim kpee.

³¹ "Elbung abola ndi bahke tane, alum enyame nehm tiki tan.†

Nnene limm, no kp'kahne ngare nyio

(Mat 24:36-44)

³² "Efung bio, a ngare nyio, nnene nehme kahn, jol babenjel ba li go ejahbetul Esowo nehme kan, jol Mmon fvfo nehm tob kahn. Nsoo ntahngtahng wo kp'kahne.

³³ "Jo kunen ekpu! Kana tiki lal! Tibre ń nehme kahn ngare nyi nsol nyio bahke limi.

‡ 13:26 13:26 Elt 1:11 § 13:27 13:27 Mat 13:49 * 13:28 13:28
Luk 13:6 † 13:31 13:31 1 Pit 1:23

³⁴ “Bahke jolo ana nne kp'tahme edi.‡ Re á tahm etahk eje sa, á bahke tohko rod alokeltum ebe bum o, eji nne awohng awohng l'jo lim eltum ene. Á bahke tongo mb'baabe re á jo baabe mbutahk.

³⁵ Kunen ekpu, tibre n nehme kahn ngare nyi nfontahk bahke kehng. Á li ma ba elgung, á li ma ba nlum atv, á li ma ba ngare nyi ekok kp'kuku. Á li ma ba efungfu.§

³⁶ Kana jo lal, eji afi nfontahk gbede na ba, á l'ki-n ba kpiri, n kp'lale.

³⁷ Ji m bungu a, tong-n li ka wahn ane kpee re wahn jo baabe.”

14

Ana bo toobo re bo bahke wulu Jisos
(Mat 26:1-5; Luk 22:1-2; Jon 11:45-53)

¹ Ngare nyio ebsa nfung ebal elkak Pasova kehm rehng, nio ni abred nya bo kil jo kak ayist. Atubesi abalimajom, a at'tibi ba atahm jo sebe mbang ana nyi bo bahke bobo Jisos mbehr mbehr song wul.

² Bo kehm bungu re, “E nehm lim ngare elkak, eji ntong l'k'gbo.”

Ana bo wohngo Jisos akehng
(Mat 26:6-13; Jon 12:1-8)

³ Jisos kehm feere je go Betani go etahk Saimon ji jolo nne abili wuku wuku. Eji bo jo li nsol, nnenkal awohng kehm bake, ba yel ekp'kpa. Á fili elom akehng ji nno a nno, ji sahb k'kim ekun.

‡ 13:34 13:34 Mat 25:14 § 13:35 13:35 Luk 12:38

Á kehm lennge elom akehng jio, yaange akehng kak Jisos go esi.

⁴ Ane bandiki ba jolo ona kehm kehme atahng rak, fere jo bung atemtem re, “Jen ji wahng ka á kp'fade akehng ana maa!

⁵ Kehn bo jol gungu, ko mpon atahl asehma, ko akpohko nyao, le akpak.” Eltim kehm rake bo tob nnenkal noo.

⁶ Jisos kehm bungu re, “Yaken ye! Jen ji wahnge n kp-e gbiingi? Yeblim nnobonobo ejum ka-m.

⁷ Wahn, ngare anyehng anyehng akpak li a nahne. L'fere kor-n, m bahke ma jo lim nnoobo ka bo. Me n nehm jol a nahne ngare kpe kpe.

⁸ Nnenkal noa eblim ji á male no. Á toobo ebjing ebame bum, bi m bahke kpoko.

⁹ Etingitingi, n kp-n tongo re, Edi ajehng ajehng go njini ji bo bahke tiingi nnoobo etib, bo bahke jo tob bung bade jia ji nnenkal noa ma lim, eji bo l'jo buum-e.”*

Ana Judas Iskariot taame re, á bahke jabbe Jisos, kak abi ane go ebo

(Mat 26:14-16; Luk 22:3-6)

¹⁰ Judas Iskariot ji woomo go ellong ewubu ane abal ba jo toono Jisos kehm tahme goji atubesi abalimajom re á song gungu Jisos.

¹¹ Eltim yebe bo sehng, eji bo wuku ji Judas jo bung. Bo kehm taame re bo bahk-e kake akpohko. Á kehm kehme elsebe mbang nyi nno nyi á bahke jabbe Jisos kak bo go abo.

* 14:9 14:9 Jon 14:26

*Ana Jisos li elkak Pasova, a abat'toono ebe
(Mat 26:17-25; Luk 22:7-14,21-23; Jon 13:21-30)*

¹² Ngbokambang efung elkak ni abred nya bo kil jo kak ayist, ni ni jolo efung bi bo wulu abon ejoro. Abat'toono Jisos kehm bahbe Jisos re, “Gan wo a kp'sebe re wahr song toobo nsol alehke elkak bum-a?”

¹³ Jisos kehm tumu ane abal, fere tong bo re, “Songen go nfam. M̄ bahke wane nne no solo etulahb. Toonen ye,

¹⁴ wahn song go etahk ji á bahke yange. Tongen nfontahk noo re, ‘Nt'tibi ewahre re, Ekp'kpa jin ji á bahke jehke, a abat'toono ebe, li elkak nia?’

¹⁵ Á bahk-n tibi ekp'kpa ji li go ero enyong, ji bo ma jehke nsol kpee. Owo m̄ bahke toobo nsol nyio bum-r.”

¹⁶ Abat'toono ebe kehm tahme song rehng go nfam, lohko song nyehn nsol kpee, nyi Jisos tongo bo. Bo kehm toobo nsol elkak nyio bum.

¹⁷ Elgung ba kan a me, Jisos kehm tahme, a abat'toono ebe, ewubu ane abal.

¹⁸ Eji bo jehk go ekp'kuru kp'lehke nsol, Jisos kehm bungu re, “Etingitingi, n kp-n tongo re, Nne awohng ewahne no kp'lehke nsol a name bahk-m jabbe, kak abi ane go ebo.”

¹⁹ Abat'toono ebe, ndon kehm kehme bo fili. No nne jo bahbe Jisos re, “Me woa, afi?”

²⁰ Jisos kehm faange bo re, “Bahke jolo nne awohng go egahne ellong no kp'tohko ebred ekpingi ajehng a name.

²¹ Mmon no nne bahke kpoko ana nwer Esowo bungu no. Erem bahke gbale sehng ka nne no ma

gungu Mmon no nne. Jol ga nob, li re, nne noo bo we jelem.”

Nsol alehke nyi elbuumu Ntul a Jisos

(Mat 26:26-30; Luk 22:15-20; 1 Kor 11:23-25)

²² Eji bo jo li nsol o, Jisos kehm rodo ebred, kak Esowo saam, kehm bakke ka abat'toono ebe, kehm bungu re, “Koon, wahn li! A wo li ngubjing enyame.”

²³ Á kehm rodo nkob, kak Esowo saam, kehm kake bo. Bo kpee kehm woko ona.

²⁴ Jisos kehm bungu re, “A wo li alung emame ma egbanngalung ji nfenfe, ma kp'fabe ka ane gbalee.†

²⁵ Etingitingi, n kp-n tongo re, N nehm kpe tiki wo alahb avain maa tete go efung bio bi m bahke kpe wo a nahne go ejahbetul Esowo.”

²⁶ Owo bo kehm yimi ese ero, kehm soro tahm asongo go ewong ji bo kpo lung re Oliv.

Ana Jisos tongo Pita re Pita bahk-e tene

(Mat 26:31-35; Luk 22:31-34; Jon 13:36-38)

²⁷ Jisos kehm bungu tong bo re, “Wahn kpee bahke dulu atv maa tib esi ejame. Tibre nwer Esowo bungu re,

“ ‘Esowo bahke wulu mbaabebul, ebul ebe yaame.’

²⁸ Ngare nyi m ma nyahme go elkv, m bahk-n gboko mbang song rehng go Galili.”

²⁹ Pita kehm faange re, “Me, wa n nehm tiki yake, jol afi egom jehka kpee yaam-a na sa.”

³⁰ Jisos kehm bungu tong Pita re, “Etingitingi, n kp-a tongo re, Re nkok kehm kuku nkpel ebal,

† 14:24 14:24 Hib 8:8-11

a bahke gbaame nkpel era atv maa re, me a nyimm.”

³¹ Pita kehm faange t'tahne re, “Me, wa n nehm tiki ten, jol afi elkv ni, m bahke tob kpo a na.” Abat'toono bako kehm tob bung ano fvfo.

*Ana Jisos song kak ero go Gesemani
(Mat 26:36-46; Luk 22:39-46)*

³² Bo kehm song rehng go etahngga ji bo jo lung re Gesemani.‡ Jisos kehm tongo abat'toono ebe re, “Jiin a, me n tohko song kak ero.”

³³ Á kehm rodo Pita, Jems, a Jon, bo tahm. Á kehm kehme elfahle, ala fere jo teal-e.

³⁴ Á kehm tongo bo re, “Eltim ename ebgbal ndon ndon sehng, jol tete rehng go elkv. Jiin ana, wahn jo baabel!”

³⁵ Á kehm jeere, je es'song, song gbo noongo ndi. Á kehm kehme ero kak re, “Nsoo, nong, me n k'lub nyehn erem bia, eyake l'fere jol. §

³⁶ Nsoo, ejum ajehng ajehng riidem go ega. Fak-m erem bia! Ana koro me sang, ana koro wo wo.”

³⁷ Á kehm feere, ba kpiri abat'toono ebe, ane ara, á ba no, bo kp'lale. Á kehm bungu tong Pita re, “Saimon, a kp'lala? A nehm ma ji awa anyehng k'lala?”

³⁸ Á kehm tongo bo re, “Jo baaben, wahn jo kak ero, eji n l'k'yel go elgaare. Etohko, mbang nyi Esowo kp-e kor, wo ga, ngubjing kp'leenge.”*

³⁹ Á kehm kpe feere, kpe song kehme ero b'nehm kak ana wuku wuku,

‡ 14:32 14:32 Jon 18:1 § 14:35 14:35 Jon 12:27 * 14:38 14:38
Rom 7:22-23; Hib 4:15

⁴⁰ kehm kpe feere ba goji abat'toono ebe, kpe ba nyehn bo, bo kp'lale. Tibre akpakamahr lubu bo ellu ellu. Bo joom kahn ji bo bahk-e t'tong.

⁴¹ Á kpe feere kan a me, á kehm ba tong bo re, “Í kpi nlale nlala? Songen, wahn song re ekv! Ebgbal. Ngare nyi ma biingi a, nyi bo bahke jabbe Mmon no nne, kak abi ane go abo.

⁴² Mehlen, wahr tahmen! Nyehnen, nne no bahk-m jabbe, kak abi ane go abo yeb rehng a kpidi kpidi.”

Ana bo bobo Jisos

(Mat 26:47-56; Luk 22:47-53; Jon 18:3-12)

⁴³ Eji Jisos kpi mbungu mbungu, Judas ji woomo go ellong ewubu ane abal, ba jo toono Jisos, kehm lohngo ba, a ellong ane ba fili akahngkahng, a atahmtahm. Atubesi abalimajom, at'tibi ba atahm, a atubesi nfam ba tumu bo.

⁴⁴ Nne no gung-e gungu tongo ane bao re, “Nne no, n l'sod-e nnyo, ye wo í kpe-e sebe. Boben ye, song a ne, wahn baab-e nob nob!”

⁴⁵ Judas rehng kan a me, á kehm jeere rehng goji Jisos, kehm-e lungu re, “Nt'tibi!” kehm soro sod-e nnyo.

⁴⁶ Bo kehm tubu Jisos ejahm g'gingi.

⁴⁷ Nne awohng no yiimi ona kehm wobo ekahngkahng go mbak, kpale nlokeltum a ntubesi abalimajom awohng etung.

⁴⁸ Jisos kehm tongo bo re, “Í fili akahngkahng, a atahmtahm re wahn ba bob-m ana nwulanea?

⁴⁹ Efung abehng abehng n jo jolo a nahne, jo tib-n go etahk Esowo, me í bobem. Tibre alum nya Esowo bungu no bahke tiki lim.”

⁵⁰ Abat'toono ebe kpee kehm soro yaam-e sa, be ebo tahm.

⁵¹ Njangkun anyehng jolo ona, nyi bobo mbare-bara mbomo mi mi. Á jo tob toono Jisos fvfo. Bo gare re bo bob-e.

⁵² Á kehm yake mbomo tv bo, kehm beke ngubjing nehme nehme tahm.

Ana Jisos yiimi go esamahr elam

(Mat 26:57-68; Luk 22:54-55,63-71; Jon 18:13-14,19-24)

⁵³ Bo kehm koko Jisos tahm a ne go etahk ntubesi abalimajom. Owo atubesi abalimajom kpee, a anebkul nfam, a at'tibi ba atahm kono nkon.

⁵⁴ Jisos jo jene ekv. Pita jen ekv. Bo ba rehng go nlaaga ntubesi abalimajom. Owo Pita ji no, a alokeltum nfontahk, jo wooro agun.

⁵⁵ Atubesi abalimajom, a atul esub jo sebe mbang ana nyi bo bahke Jisos ebi ka, toono o, bo wul-e. Bo tikem nyehn ebi ajehng ajehng ji Jisos limi no.

⁵⁶ Atianse gbalee jo kiimi afahnge lake Jisos. Alum nya bo jo bung joom yel.

⁵⁷ Ane bako kehm kpe mehl, kiimi afahnge lak-e re,

⁵⁸ "E wuk-e ana á bungu re, á bahke wake etahk Esowo jio ji ane si no, fere tuungu si ji nfenfe o nfung era, ji bo kala s'si."†

⁵⁹ Atianse nya bo jo yiimi, anyo joom yel jang jang.

† 14:58 14:58 Jon 2:19

⁶⁰ Ntubesi abalimajom kehm mehle yiimi, kehm bahbe Jisos re, “A nehme faanga? A nehme wuk ebi ji atianse nyaa kp-a kaka?”

⁶¹ Jisos belle na belle, jol á faangem ellum anehng anehng.‡

Ntubesi abalimajom noo kehm-e kpe bahb re, “Wo wo li Mesaya, Mmon no Esowo bi gbale sehnga?”

⁶² Jisos kehm faange re, “Me wo. M bahke nyehne Mmon no nne jehk go eboblum Esowo bi kpi nsahm. M bahk-e nyehne ana á kp'bake go akparesemsem.”§

⁶³ Ntubesi abalimajom kehm yare ewobo eje, kehm bungu re, “E nehme kpe seb ntianse anyehng anyehng.

⁶⁴ Wahn ebwuk abi alum enye, ana á ma su Esowo. N kp'tiri renan?” Bo kpee kehm bungu re, “Yebgbo ntahm. Nobo re bo wul-e.”

⁶⁵ Egom jindiki kehme atel so wohngo Jisos. Bo gba-e mbomo go esamahr, kehm-e kehme eldohko. Bo kehm bungu re, “Nyehn-r amahr me!” Alokeltum bao soro kehm-e nkpal ruumu.

*Ana Pita tene Jisos re, we á nyimm
(Mat 26:69-75; Luk 22:56-62; Jon 18:15-18,25-27)*

⁶⁶ Ngare nyio Pita kpeke li go nlaaga nyio. Owo nlokeltum a ntubesi abalimajom no jolo nnenkal kehm bake.

‡ 14:61 14:61 Elt 8:32 § 14:62 14:62 Ell 14:14

⁶⁷ Á nyehne kan Pita a me, eji á kpi agun wooro, á kehm-e seenge too, kehm-e tongo re, “Wo fvfo tob jolo a Jisos ji Nasaret.”

⁶⁸ Á kehm gbaame re, “Me, we n nyimm. N nehme wuk ji a kp'bungu.” Á kehm lohngo, song yiimi go mbuga. Nkok kehm soro kuk.

⁶⁹ Nlokeltum noo kehm-e kpe nyehn, kehm kpe bung tong ane ba yiimi o re, “Ye wob go bo ellong.”

⁷⁰ Pita kehm kpe ten. Mmongare ntiil ane ba yiimi o kehm kpe bung tong Pita re, “Go etingitingi, wo wob go bo ellong. A lohng go Galili. Wahr ma-a liingi go ega alum.”

⁷¹ Pita kehm tiri re, “Esowo demm-m na demme. Nne no n kp'bungu bada ne, me, we n nyimm.”

⁷² Nkok kehm soro kpe kuk. Owo Pita kehm soro buumu ellum ni Jisos bungu tong-e re, “Re nkok kehm kuku nkpel ebal, a bahk-m tene nkpel era.” Á kehm kehme ellingi ndon ndon.

15

Ana Jisos yiimi go esamahr Paillet, nne a Rom no jo fili Juda

(Mat 27:1-2,11-14; Luk 23:1-5; Jon 18:28-38)

¹ Etoono efungfu behko atubesi abalimajom, at'tibi ba atahm, anebkul nfam, a atul bako ba esub kehm toobo ana bo bahke limi. Bo kehm kake Jisos agbekobo, kehm-e rodo, tahm a ne, song kak Paillet go ebo.

² Paillet kehm-e bahbe re, “Wo wo li ntul no Jusa?”

Jisos kehm taame re, “Ee, me wo.”

³ Atubesi abalimajom bao ona kehm kehme eltooro nsol gbalee, fere jo ka-e ebi.

⁴ Paillet kehm kpe bahb Jisos re, “A nehm faanga? A nehme wuk ebi ji bo kp-a kaka?”

⁵ Jisos kpeem faange ejumjum. Paillet kehm-e kpoko esi area.

Elam ji bo kimi re bo wul Jisos

(Mat 27:15-26; Luk 23:13-25; Jon 18:39-19:16)

⁶ Ngare elkak (Pasova) anyehng anyehng Paillet jo yehke nne a ngbekobo awohng yake, no bo l'seb.

⁷ Ngare nyio ona nne awohng woomo go ngbekobo, no bo jo lung-e re Barabas, budu ate ebe ba jo wul ane, eji bo jo jokko ejahbe.

⁸ Eji ellong ane kame no ba rur, bo kehm tongo Paillet re, á yehke nne awohng. Ano wo eljini ene jolo no, ni á jo kono ellimi.

⁹ Paillet kehm bahbe bo re, “N kp'sebe re me n yehke ntul no Jus ka-na?”

¹⁰ Á jo kahne re, atubesi abalimajom ebyake Jisos ka-e, tib eji á jo teele bo ala.

¹¹ Atubesi abalimajom kehm nyare ellong ane bao, eji bo l'gbiingi Paillet, á yehke Barabas yake, fere wul Jisos.

¹² Paillet kehm kpe bung tong ellong ane bao re, “Jen ji n kp'sebe re me n lim nne noa no n kp-e lungu re ntul no Jus?”

¹³ Bo kehm rabe re, “Kum-e go ekros!”

¹⁴ Paillet kehm bahbe re, “Anv, jen ji á ma l'lim?”

Bo kehm kpe rabe tiim re, “Kum-e go ekros!”

¹⁵ Paillet jo sebe re, ellong ane bao bel eye-batahng, owo á kehm yehke Barabas yake, yake

Jisos ka, bo dv-e. Bo dv-e kan a me, Paillet rod-e, kak nsoja go abo re bo song kum-e go ekros.

*Ana bo nyoko Jisos
(Mat 27:27-31; Jon 19:2-3)*

¹⁶ Nsoja nyio kehm rodo Jisos, yange a ne go nlaaga ntubesi ejahbe. Bo kehm lungu ellong nsoja nehko re bo ba.

¹⁷ Bo kehm kake Jisos mbilibili ekpawobo ana ji atul jo kono elkake, kehm tahnge ekspasi akpiri, ba konng-e go esi.

¹⁸ Bo kehm-e kehme nnyo mia kak re, “Wo noaa, ntul ewahra?”

¹⁹ Bo kehm koko ehti, jo rum-e go esi, kehm kehme atel so wohng-e, jo gbo jamm-e alahng, are bo kp-e kake na.

²⁰ Bo nohk-e kan a rahke, bo kehm-e yehke ekpawobo jio, kehm feere a nsol enye kak-e, tahm a ne re bo song kum-e go ekros.

*Ana bo kumu Jisos go ekros
(Mat 27:32-44; Luk 23:26-43; Jon 19:17-27)*

²¹ Eji bo fi mbang mbang, bo kehm nyehne nne no bo jo lung-e re Saimon ji lohng mmojahbe noko kp'bake go Jeusalem. Bo kehm-e bobo re á sol ekros ji Jisos. Saimon jolo nne a Sirin, ye wo jele Aleksanda, a Rufus.*

²² Bo kehm koko Jisos tahm a ne go edi ji bo jo lung re Golgota, ji lohngo re Edi Nkpakesi.

²³ Owo bo gare re bo ka-e amahm semme anyane nya bo kpo lung re mmir. Jisos tikem wo.

* 15:21 15:21 Rom 16:13

24 Bo kehm-e kumu go ekros, rod abomo enye bum, fere tub elfaange re bo kahn ana nne awohng awohng bahke koko.

25 Jolo nkaranka esehmwubu nyi efungfu nyi bo kum-e go ekros.

26 Ejum ji wahng ka bo kum-e lake go ekros, ji ji bo nyono go ekros re, “A wo li ntul no Jus.”

27 Bo tob kumu awulane, ane abal lake ona, noko, bo kum-e go ege ejang eboblum, noko go ege ejang ebobkal.

28 Ana wo li ellum ni nnyehnamahr Esowo bungu no go nk'kula ngare re, “Bo bahk-e fange kak go ellong abi ane.” Ni ni a, ma lohko jol.

29 Ane ba jo sehng mbang jo tiib-e abo, fere jo su-e re, “A tongo re, a bahke wake etahk Esowo, fere tuungu si ji nfenfe go nfung era.

30 Tahre elna, wo badde go ekros me!”†

31 Atubesi abalimajom, a at'tibi ba atahm jo t'tob nyok-e fvfo, fere jo bung atemtem re, “Á kpo tahre ane bako. Yefono nehm ma tahre elne.

32 Nong, wahr nyehn ana Kraist, ntul no Israel, bahke badde go ekros ba, eji e l'taame tv-e.”‡

Ane ba, bo tob kum bo go akros fvfo jo t'tob su Jisos.

Ana Jisos kpo no

(Mat 27:45-56; Luk 23:44-49; Jon 19:28-30)

33 Eji efin ma yiimi, ejanng ekehm gboko go ejahbe jio kpee, ji tete biingi awa na ara.

34 Nkaranka era nyi elgung Jisos kehm rabe w'wahre w'wahre re, “Eloi eloi lama sabaktani!”

† 15:30 15:30 Luk 4:23 ‡ 15:32 15:32 Mat 16:1,4

ji lohngo re, “Nsoo, nsoo, jen ji wahng ka a ma-m yake anae?”

³⁵ Eji egom ane bandiki ba jolo ona wuku alum nya Jisos bungu no, bo kehm bungu re, “Wuken, á kpi Elaija lung.”

³⁶ Nne awohng kehm beke song ko nd'dahng, suku go amahm, tung go esi ebtí, kehm tabe ton Jisos go ege a nnyo re á yab. Á kehm bungu re, “Nong, wahr tohko ny'nyehn, joare Elaija bahke bake, ba fon-e go ekros.”

³⁷ Jisos kehm soro rabe, soro kpo.

³⁸ Ekpiki ji bo tohko go etahk Esowo kehm soro yang, bomo ero tete ba jahm ndi. §

³⁹ Eji ntubesi a nsoja no yiimi ona wane go ekros nyehne ana Jisos kpo no, á kehm bungu re, “Nne noa ana lohko jol Mmon Esowo!”

⁴⁰ Anebkál bako jolo ona, ba yiimi go fee, jo nyehn, Salome a Meri ji lohng go Magdala, go Meri nnyehn a Joses abola Jems, ji jolo mmonse. Bo tob woomo go ellong nio.

⁴¹ Bo jo toono Jisos ngare nyi á jolo go Galili, fere jo kak-e ebo. Ellong anebkal bako ba tob toono Jisos ba go Jeusalem fvfo, tob jolo o.

Ana bo kake Jisos go elahm

(Mat 27:57-61; Luk 23:50-56; Jon 19:38-42)

⁴² Efung bi bo kpo toobo ebjing bi elkak Pasova, bi sene efung Esabat,

⁴³ owo Josef ji lohng go Arimatia kehm bake. Á jolo nlamalam no jo sahb l'lub ane. Á jo siki elbake nio ni etul bi Esowo. Josef jo sahb tahm

song kpiri ntul a Paillet, kehm-e bahbe re á lub taame, á song fono ekv ji Jisos.

⁴⁴ Paillet kehm-e sahb kp'kpo esi, eji á wuku re, Jisos ebtahr kp'kpo. Á kehm lungu ntubesi a nsoja, kehm-e bahbe, joare yebtahr kp'kpo.

⁴⁵ Eji Paillet wuku goji ntubesi a nsoja noo re, yeblohko kpo, á kehm tongo Josef re, á song fono ekv ji Jisos, song a ji.

⁴⁶ Josef kehm gunu mbarebara mbomo, kehm song fono ekv ji Jisos, fere kpennge mbomo mio, rod tahm a ji, song kak go elahm bi bo rahme go ekpartal. Á kehm banngel eltal, bulu go nnyo elahm.

⁴⁷ Meri ji lohng go Magdala, abola Meri nnyehn Joses, bo jo kpuru re bo nyehn edi ji bo kake Jisos.

16

Ana Jisos nyahme go ekv

(Mat 28:1-8; Luk 24:1-12; Jon 20:1-10)

¹ Eji efung Esabat ma sehng, Meri ji lohng go Magdala, a Salome, go Meri nnyehn Jems, bo song gunu ajoobo akehng re bo song taame ekv ji Jisos.

² Ngbokambang efung go erahde, efungfu atv atv, bo kehm tahme go elahm ngare nyi njul ma ta elbange.

³ Bo kehm kehme elbundu atemtem re, “Anv, nne awo bahke banngel eltal nio go nnyo elahm ka-r me?”

⁴ Jolo egburu eltal ni nnen a nnen. Eji bo rehngel go elahm, bo kehm tabe asamahr ebo, soro nyehn eltal nio ma banngel, noongo go nkpe.

⁵ Bo kehm soro yel go elahm. Owo bo nyehne njangkun jehk go ejang eboblum, nyi kake mbarebare ekpawobo. Bo kehm kehme elfahle.

⁶ Njangkun nyio tongo bo re, “Kana kpe fahl! N kpi Jisos ji Nasaret seb, ye ji bo kum-e go ekros. Ana á limm. Yebnyahme fi. A wo bo bum-e no.

⁷ Songen anv, wahn song tong Pita, a abat'toono Jisos bako fvfo re, Jisos bahk-n gboko mbang song rehng go Galili. Go wo m bahk-e nyehne, ana á tong-n no.”

⁸ Owo bo kehm soro lohng go elahm, be asongo. Tibre ala jo t'teele bo, akahb fere jo kahm bo. Bo tikem bung ejumjum, tong nne awohng awohng. Tibre bo jo ffahl.

*Ana Jisos kpiri Meri ji lohng go Magdala
(Mat 28:9-10; Jon 20:11-18)*

⁹ Eji Jisos nyahme go elkv, á nyahme ngbokambang efung go erahde nkpefe efungfu. Á gbo mbang kpiri Meri ji lohng go Magdala, ye ji á kam-e abi atohko na asehma yehke.

¹⁰ Meri kehm tahme song tong ane bao ba jo toono Jisos, ba ji ndon ndon, fere jo ling.*

¹¹ Eji bo wuku re, Jisos noa go elkpin, Meri m-e nyehn, bo tikem taame tv-e.

*Ana Jisos kpiri abat'toono ebe, ane abal
(Luk 24:13-35)*

¹² Fvfo, Jisos kehm tob kpiri abat'toono ebe, ane abal, go elfoongo nne nondiki eji bo ma lohng go Jeusalem kp'tahme ejahbe jehko.

* 16:10 16:10 1 Kor 15:3-8

¹³ Bo kehm feere ba tong abat'toono baka, jol bo tikem taame tv bo.

Ana Jisos kpiri abat'toono ebe, ewubu a nne awohng

(Mat 28:16-20; Luk 24:36-49; Jon 20:19-23; Elt 1:6-8)

¹⁴ Es'kohro, Jisos kehm ba kpiri abat'toono ebe, ewubu a nne awohng, eji bo kpi nsol li. Á kehm nyame bo tib go bo ek'taame, a etahnsi ebo. Tibre bo tikem taame tv ane bao ba nyehn-e no, fere ba tong bo re, yebnyahme go elkv, fere jol go elkpin.

¹⁵ Á kehm bungu tong bo re, "Songen go njini kpee, wahn song bung alum Esowo tong nne awohng awohng.†

¹⁶ Nne no l'taame, fere bel ewohngalahb, á bahke bele eltahre. Nne no tohko fere taame, á bahke lehke ebi.

¹⁷ Ane ba l'taame, bo bahke bele nsahm nyi bo bahke jo lim akpokosi. Bo bahke jo kam ane abi atohko yehke go egama mbing. Bo bahke jo bung go ajahbe nfenfe.

¹⁸ Bo l'rod enyo go abo, fere wo ebi ekahm, ejumjum nehm lim bo. Bo bahke jo kunu aneb ayam abo, bo nob."

Ana Jisos tahme go ejahbetul Esowo

(Luk 24:50-53; Elt 1:9-11)

¹⁹ Eji Ntul a Jisos ma bung a bo mal, nsahm Esowo kehm-e soro rod, tahm a ne go ejahbetul Esowo. Jisos song ji go eboblum Esowo.

²⁰ Abat'toono ebe kehm tahme, jo bung alum Esowo edi ajehng ajehng. Jehova jo kake bo ebo,

† 16:15 16:15 Elt 5:28; Rom 15:19

fere jo yiimi ntianse ka alum enye nya bo jo bung,
eji bo jo lim akpokosi nya á ka bo re bo lim.

lxxx

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4